

TÈÈLEJÀ DÌYÌ DYÈNDÈ



Twasàkidila, Mwanèètù Neville. Ngèèla meeji nè bààkamba kùdì Davidì nè: “Mvwa nè disànka pààkangambilàbò nè: tuye mu nzùbu wa Mukalenge.” Kùdì ànu cintu kampàndà bwà kàlaasà kàà Dyàlumingu cidì bitùpà bikwàbò byà disangisha kabiyì naaci to, dībà dikwàbò dyònsò dyà mu ditùkù. Patùcidì tubiikilakù ku diikisha dimpè dyà bufùku, nè— nè tudì tudyùmvwakù ànu bashiilàngàne, nè udi nè cyashima nè mudìlongòlòle bwà ditùkù.

² Mpindyewu tudì tuumvwa nè. . . Makèèlèlè dilòlò awu, tuvwa bakonkè ba—bantu ní bàvwa nè èkèleeziyà wabò. . . uvwabò bàyamù awu, beenyì anyì—anyì. . . ndi muswè kwamba nè, bidimba byà ciibidilu byà maèkèleeziyà, bwà nè bàvwa nè cyà kuya mu èkèleeziyà wabò sungasunga mu dindà emu. Bwalu, twètù bu mutùdì bantu bàdì kabàyi bàsungulujangana bilondèshìle màngumba to, katwèna ànu baswè kuumusha bantu mu disangisha dyàbò bóbò to.

³ Nènku ntu mubandiibwe misangu yàbùngì bwà—bwà dipiisha maèkèleeziyà. Aci’s ncyà mafi. Ncitu mpiisha maèkèleeziyà makwàbò to. Ntu mpiisha, misangu yàbùngì, bintu bidìbo—bidìbo bàlekelela byènzeka abi, kàdì ncyà bushùwà nè ncitu mpiisha èkèleeziyà to. Kàdì, misangu yàbùngì, pàdìbo bàlongesha bintu bidì bibèngangana nè Mifùndu, dībà adi ndi—ndi mpiisha aci. Nè pashiishe pàdìbo bènza bintu bidì bibi, nè— nè bàanyisha bwà kwenjiibwabi mu èkèleeziyà yàbò, ndi mpiisha aci’s. Kàdì kacya. . . Ànu mùdìbi byambiibwe. . . Ndi nè balundà bààbùngì beena Kàtòlikè basòmbe kaaba aka, kàdì kacya ncitukù mpiisha beena Kàtòlikè to. Ndi mpiisha dilongesha dyà èkèleeziyà wa Kàtòlikè, bwalu ncyèna ngiitabuujà nè ndyà mu Mifùndu to. Kàdì ncyèna ntàmba kubàpiisha kutàmba mùndì mpiisha àbùngì à ku màngumba à beena Mishònyì to, bwalu ncyèna ngèèla meeji nè bidi bilondèshìle Mifùndu to. Nènku ndi mwenzèjiibwe bwà kutwà cidì Bulelèlè nyama ku mikòlò. Nwamònu anyì? Nudi bamanyè’s, Nzambi neàkwanyishè bu wèwè mwà kwikala wa kweyemena, ànu nè meeji matòoke.

⁴ Nudi bamanyè’s, misangu yàbùngì, muntu udi wenda ukèbangana nè mukàjì wa kusela, muntu mulùme mulelèlè mwikàle nè buntu bulùme mu yèyè, yèyè kèna ukèba ànu menemene mwànà wa bakàjì udi mulenga bikolè—bikolè kwisù awu, anyì bikwàbò to. Yèyè mmumanyè nè abi nebijiminè, dimwè dyà ku matùkù àdì panshì aa. Nwamònu anyì? Yèyè ùdì ukèba mukàjì udi mukàjì mu buumùntù, mukàjì mulelèlè. Nènku piikalàye nè lulamatu, nè mukàjì mulelèlè, mulùme awu neàmwanyishè. Nànsha yèyè mwikàle mu—muntu mubi wa bishi, nè nànsha yèyè wènda ùnyunguluka mùshindù kaayi nè—nè

bakàjì babil; kakwènakù muntu mulùme mubì pa buloba apa udi kàyì mwà kwanyisha mukàjì udi mwà kushààla menemene cidi mukàjì nè cyà kwikala aci to. Ncyà bushùwà. Bwalu, yêyè ùdi wànyisha cyòci aci.

⁵ Nènkù ke mùshindù awu wùdibi ku—ku diyiisha dyà Dīyī, bu muntu mwà kukwàta ànu ku cidīyè wītabuuja aci. Mpindyewu kwèna. . . Wavùluka nè, Nzambì mmumanyè mwoyi wèbè. Nènkù bu wèwè mwà kukwàta ku cyùdi wītabuuja menemene nè m’Bulelèlà aci, dībà adi udi mwà kwikala nè diitabuuja mu cyùdi wakula aci.

⁶ Ndi nè ndambù wa balundà bimpè mwab’ewu. Mwanèètù wa balùme Charlie Cox, ùndi mmòna musòmbe kuntwaku. Nè ndambù wa mbingu mishààle eyi, mvwa muyè nendè mu Kentucky, mu kulemba kwà nshindi, kùmwà mupete ndambù wa diikisha. Mwanèètù Banks Wood. Nènkù, mpindyewu, twètù, patùdi tudībidija nè bingoma byètù, bóbò. . . Bidi bìnkèngela bwà cyànyì cīikale ànu cipwàngàne menemene mu mùshindù wà cifwànyine kufikisha dizajì ku cintu mu ntàntà wa metèlè makùmi ànaayi nè àsambòmbò, cyanààna ncyèna ànu mwà kulemba to. Nwamònu anyi? Kwàjiki.

⁷ Èè, bidi nè dikwàcisha kaayi bwà kwasa dizajì ànu pa katòba menemene? Nwamònu anyi? Bwalu, wèwè wasa nshindi, washila ku mutù, nè mutù wèndè mwikàle pàmwàpa bunène *ebu* eku nè eku, mwaba kanà wònsò munda mwà nyùngulwilu wa centimètres yibidì anyi yisàtù nebiikale ànu bimpè, nwamònu’s, mwaba kanà wònsò muntwamu. Yònsò wa ku bāna bāa balùme abu neāmbè nè: “Abi’s mbimpè. Ndi mwasè nshindi.” Badi bàya nè bàāngata nshindi awu. Kadi, bwànyì mèmè, bikèngela cīikale ànu cipwàngàne. Bikèngela cilengè cintu ciludikila aci. Kacyèna mwà kucipangila mu cyàbinaayi cimwè cyà cyālā to. Cidi nè cyà kulenga cintu ciludikila aci ànu munkàcīnkacī, cyanààna ndi ànu mbīnduluka nè nsaluka.

⁸ Nènkù mvwa musòmbe panshì, ditùkù adi, mu diitu, nè mvwa munkacì mwà kwamba nè: “Mukalenge, bwà cinyi—bwà cinyi ndi muntu wa cimfīkààmùndà wa mùshindù ewu? Bwà cinyi Uvwa mungenzè muntu wa cimfīkààmùndà wa mùshindù ewu?” Mèmè nè: “Mpindyewu kùdi. . .”

⁹ Mwanèètù Banks kuyayè kalemba nè cingoma cyèndè aci, kadi kucibāndishila kuulu bwà kujoojilamù nè kwasa, nè tulòndò twà dimwènamù atu. Nènkù udi ànu. . . Ku musangu nè ku musangu, udi mufwànyine. . . dimwè nedipèmbukè, bwalu bu cyòci. . . Cyàpù cidi cyèenza màzajì necyenzè nānkù, mu mishindù yònsò, bwalu mùdi mwà kwikala kapyà kàa cingoma katāmbidīlè ndambù, anyi kapyà kàa cingoma kashāādīlè ndambù. Kadi cīvwa ànu mwà kupèmbuka kakesè, anyi mu cyālā cimwè anyi bibidì, Mwanèètù Banks ùdi wamba nè: “Kaa, abi’s mbimpè, mèmè’s ndi mwasè nshindi awu. Abi’s

mbîmpè.” Kabyèna—kabyèna bîmutàcisha to. Charlie pèndè, ànu mùshindù wùm wèwùm wè awu. Kàdi mèmè. . .

¹⁰ Dyànyì dîzajì dîdî nè cyà kutuuta cintu ciludikila aci, ànu munkaci menemene, cyanààna bîdî bîmbîndulula. Mèmè nè: “Nkaadi mulwè muntu wa cimfiikàmùndà ànu wetù wa ciibidilu ewu.” Nènku dîbà adi mèmè kubanga kutàngila paanyimà, kàdi kusangana nè nsòmbelu wanyì ùdî ànu mùshindù awu. Ke mwànyì mùndî mwenjiibwe. Ke mèmè kudyàmbidila nè: “Èè, Udi mungenze mùshindù awu bwà cinyì?” Bîtu mene bîmvwija mubîndùlùke cyòci—cyòci cipèmbùke ànu kakesè ndambù *eku* anyì *eku*. Nènku’s ke mùshindù awu dîbà adi ùdî Mukalenge mucimbuulwile, mèmè musòmbè kuntwaku, mu Glutton Hollow, kwònsò kutùvwà tusanganyibwa aku, munkaci mwà kulemba nyama. Aci, ngèèla meeji nè bàdî bàcîbîikila nè Dutton; kàdi, nshîndî yîtu yîdyà lùkàsàlùkàsà, ntu ncîbîikila nè: “Mudyàvi.” Pa nàнку yîtu. . .

¹¹ Lwà kuulu mu mwab’ewu, mèmè kudyàmbidila nè: “Ke cyòci aci’s.” Ncyìvwakù mene mwà kulongeshakù nè ifernò kampàndà ùvwakù to ànu pàngàkatwîshîibwa bwèndè. Nwamònu anyì? Nènku kî bwà cinyì Mufùndù wòwò wùdyànjîla kwamba bwà dyondopa dyà kùdî Nzambî, nè *apa*, bîmwèka mùshindù *kampàndà* nè mùshindù *kansanga*; piikalà Mufùndù wàmba nè: “Taatù, Mwànà, nè Nyumà Mwîmpè,” byenze bu kùdî Nzambî yîsàtù, nè *Mwòmò amu* mèmè ndî mmòna nè kùdî ànu Umwèpelè; nènkù mpîndyewu mmunyì mungîikalà ànu mwà kwenza nàнку ku mpùùkàpùùkà, bwà muntu kampàndà mukwàbò, cîdiye wàmba pa Cyòci aci, kucyàngata mùshindù awu’s? Piikalà Bible wàkula bwà didyànjîla-kulongolola nè ngàsà, kàdi *apa* ciikàlè nè byenzedi, nè *apa* ciikàlè nè ngàsà. Nènku ncyèna—ncyèna ànu mwà kuciyiisha mùshindù awu to.

¹² Ndi nè cyà kukosa bwalu bwàcî, nè eku nè eku, eku nè eku, nè mu Bible mujimà, too nè mùdîci menemene cîlenga cintu ciludikila, nwamònu’s, too nè mùdîci cyà bushùwà cipàtukila ànu bipwàngàne mu Mifùndù mwònsò. Dîbà adi pàndî ngîimana, ndi cyà bushùwà mwà kwikala nè diitabuuja mu cîndî munkaci mwà kwenza aci, nwamònu’s, kumanya nè cyùdî uyiisha aci m’Bulelèlè. Nwamònu anyì? Nè pashîishe muntu kampàndà yèyè mubèngàngàne naaCî, ukààdî mumanè kulonga bikùmbàne too nè mùdî umanya ànu menemene cîdiYe wàmba, mwaba wà kumwimanyikila, nwamònu’s, ànu *Apa* mene. Nwamònu anyì? Nènku’s ke mùshindù awu wùdîbî. Nzambî mmutwènze mishindù mishîlèshîilàngàne, bwà twamòna ànu cyanààna mwà. . . Aci ke cîdî cyèenza nè buloba bwikalè mùshindù awu. Kàdi, aci’s ke citù cimvwija muntu wa mubiîndùlùke, wà musakùlùke. Cîdî nè cyà kwikala ànu cyòci.

¹³ Nènku ndi nè disànkà dyàbùngî, dilòlò edi, leelù ewu, mu dîndà emu—emu, bwà kwamba nè ndi mumanyè nè Mukalenge Yesù kî mmufwè to. Yèyè ùdî nè mwoyi, nè Yèyè ùdî ànu kaaba

aka mene mpindyewu ànu mwàkadìYe musangu kanà wònsò pa buloba mu Ngalèlè anyi mwaba mukwàbò kanà wònsò. Yèyè m’Mwànà wa Nzambì udi nè mwoyi, mubiishìbwe ku lufù, udi myaba yònsò, mwikale nè mwoyi. Aci cìdì. . . Nè bu mémè nciyi mufwànyine. . .

14 Bu mémè mwà kulongesha Mufùndu wà Nzambì kampàndà wa maalu-malonda, nè nciyi mutwishìbwe nè Yèyè ùvwa mwab’ewu mene, nùnkù’s ndi—ndi mupete cibwejàkàjì cyà menemene. Ncìfwànyine kumfikisha ku dibinduluka bikolè, mu mùshindù wà nciyì mwà kumanya cìmvwà ngèza to. Nwamònu anyi? Nènku ncìvwa mufwànyine kumanya mwaba wà kwambila bantu nè: “Èè, mpindyewu, Yèyè neenzè *cikampàndà*, anyi Neenzè *cikansanga to*.” Ncìvwa—ncìvwa mwà kunwàmabila to. Ncyèna mumanyè to. Kàdi paùdì mumanyè cyàkalayàYe nè Yèyè neenzè, nè muMumòne ùcyèza, díbà adi udi umanya mwaba wúdi mwimànyine. Nwamònu anyi? Nènku mònaayi mùvwà Nzambì, mu ndongamu Yèndè minène, mumanyè ànu mwà kwenza nè muntu yònsò ikale ànu menemene cintu kampàndà, bwalu Yèyè neàkwatè nendè mudimu bwà kiipàcilà aku.

15 Nudi nuumvwa inàbànzà mutekète awu mwab’ewu, kùkaadi katancì anyi? Mandamu Stricker, wimba misambu kàyì nànsha nè mijiki to. Ùvwa nè cintu kampàndà cikesè cyà mùshindù kampàndà cìvwàye ùpwìdijilamù mupùùyà, bwà kucipèèsha cyonà, notè wendè—wendè anyi cyònsò cinùdì nucibiikila aci. Kàdi ùdi wimana nè wimba nè dīyì dyà pànshì menemene adi, nè kudibàndisha, nè: *Wèwè Mázuwà!* Mpindyewu, bìvwa bìkèngela bwà nwènù kungumvwa nteeta aci musangu mukwàbò. S’mbìfwànyine kwikala byà byenza nè bwòwà’s. Kàdi, nudi numòna’s, Nzambì ùvwa mumanyè ànu menemene mwà kwenza mukàjì awu bwà wàkùmbana mwà kwenza nànkù.

16 Kàdi’s ke mùshindù awu. Tudi bònsò benza mùshindù mushiilàngàne. Bu twètù ànu mwà kupetakù kaaba kèètù mu Kilistò, nè kushààlamù nè kuMukwàcila mudimu.

17 Ndi mmòna mwànà mukesè wa bakàjì musòmbe kaaba aka, mu dindà emu, mu dikalù dyà balèmà. Mwoyi wèbè mukesè awu wùbèneshiibwè. Ncinyi cìdì cikucìbwile pànshì, munanga wanyì? Dikòny dyà misunya-. . . dikòny-. . . Kaa, ncyèna mwà kwamba mwàkù awu to, pàndì ntwàdijà to; dikònyangala, anyi ní ncinyi. Ke cìdì bwalu ncyòci aci anyi, munanga wanyì, cìdì cikucìbwile pànshì, anyi ntunèkè? Tunèkè. Udi mumanyè nè, Yesù ùtu òndopa bânà bàà bakàjì batekète, kí mmwòmò anyi? Wèwè udi mwànà mukesè wa bakàjì mulenga wa dikèma. Nènku ndi ngiitabuujà nè Yesù neàkusàngàjè.

18 Makèlèlè dilòòlò awu, bânà bàà bakàjì batekète bàbidì bàvwà basòmbe kaaba aka nè disaamà adi divwà mene muntu nànsha umwe pa buloba apa kàyì mumanyè nè cìvwa ncinyi

to. Minu yàbò mikesè ayi milembèlèlè, nè makàsà àbò makesè kacya àlembelela. Bânà bàà bakàji batekète bàbìdì balenga. Nènku kwenzekabi nè mmanyè mamwàbò nè kakwàbò mukàji. Ke mémè kudyùmvwa mulombòdìibwe bwà kupiisha démon uvwa mwà kuyumbakaja tukwàcikwètù tukesè tùvwà tusòmbe mwaba awu atu; ànu dyàkàmwè. Nènku bàvwa mu tùkalù twà balèmà ncyèna mumanyè nè kùkaavwa ntàntà bule kaayi to. Kàdi makeèlèlè dilòòlò awu, ke lumù kulwilalù, ku nshinga nè: “Bânà bàà bakàji abu mbiimànyine kuulu, bènda bànyùngùluka.” Nudi numòna aci, nè—nè Mukalenge Nzambì ùvwa mubenzèlè ngàsà mutàmbe búngì. Kaa, Yèyè’s mmwìmpè be bwètù twètù! Bìvwa bikèngela twètù kutàmba kuMwanyisha.

¹⁹ Pashiishe mvwa ndyàmbidila, ànu makèèlèlè dilòòlò awu, paanyimà pàà mémè mumanè kwalukila kumbèlù nè mudyàdije panshì munda mwà tusunsa tukesè, Mvwa ngèèla meeji ku nè: “Pàdì musùùkà wùpàtuka munda mwà muntu, cìdìku ncinỳì?” Mmuntu wendè wa munda awu ngudi mupàtùke. Kì mmufwè to. Yèyè’s—yèyè’s ùcìdì ànu nè mwoyi. Nwamònu anyi? Yèyè—yèyè ùdì nè mwoyi kashidi. Nènku bananga bèètù bàkaadi bayè dyàmwàmwà dyà cibwikilu eci abu, bàdì mu mubidi kampàndà—kampàndà wutùdì katùyì bamanyè nè ncinỳì to. Kì ncibuulula to.

²⁰ Kùdì bitùpà bisàtù byà cintu cyònsò. Kùdì citùpà cyà mubidi wà cifwàkà, mubidi wà kawùyì wùfwa, nè pashiishe mubidi mutùmbishìibwe. Nwamònu anyi? Ànu mùdì bikwàbò bintu ebi, bu mùdì. . . Taatù, Mwànà, nè Nyumà Mwìmpè, bibwela mu kajila kàmwèpelè, nè bisàtù abi byènza Umwe. Dibingishiibwa, dijidiibwa, dibàtiiza dyà Nyumà Mwìmpè, mu kajila, bìdì byènza umwe awu. Pashiishe, nè musùùkà, mubidi, nè nyumà, byènza umwe. Nènku bìdì byènda mu bisàtù abi, kàdì bisàtù abi bìdì umwe. Kàdi angàtàbì cipese cyà—cyà lumwènu cyà ntengu yisàtù nè ùcìtèèke pa muunya, necileejè meekala, kàbìdì, meekala mwandamutekète neàshaale òmwèpelè.

²¹ Kàdi ùdì wangata dikùnze, nè utàngidila dikùnze mu dikùnze. Mbanganyì bàdì bamanyè diikala kaayi diikalàci? [Disangisha didì dyàmba nè: “Ditòòke.”—Muf.] Ditòòke. Uh-huh. Kabyènakù bikèmesha anyi? Aci, cikùnze munda mwà cikùnze, cìdì cimwèka citòòke. Bukùnze ncimanyinu cyà bupikudi. Nènku paùdì. . . Nzambì utàngidila mpèkaatù yètù mikùnze, mu Mashi makùnze à Mwàn’Èndè wa musinga mukolè awu, yìdì mitòòke. Pa nàнку, kàdì, bikèngela Yèyè àtangidilè mu Mashi. Kabiỳì nàнку to, yìdì ànu mpèkaatù. Pa nàнку bikèngela twikalè mwìnshì mwà Mashi.

²² Nènku pàdì musùùkà wùmuka mu mubidi, wùdì wùkwàta njila wùya mwaba wà diikisha, mu mubidi wùdì mu mmwènekèlu nè mbùngakeenu wa mubidi ewu, kàdì kì mmubidi wà mùshindù ewu to. Neùtwìlanganè nè bananga bèèbè. Kwèna mwà kubàlabula ku cyanza to. Udi mwà kwakula naabò, udi mwà kubàtangila. Bàdì bàmwèneka ànu mùdìbo mwab’ewu

emu. Bwalu, pàvwa Peetèlò, nè Yone, nè Yakòbò, bamònè Mòsà nè Eliyà, bàakabàjingulula, pa Mukunà wà Dikùdimuka dyà mpàla. Kàdi's, mmubidi.

²³ Kàdi pashìishe pàdì mubidi awu, mwenze bu mubidi kampàndà wà mu dyulu, pàdìwu wùpingana pa buloba, wùdì wàmbula bintu bì—bìvwàwu musòmbèlemù musangu kampàndà awu, nè pashìishe wùdì wùlwa mubidi mutùmbishìibwe. Nè mubidi awu ke wòwù utwàmòna naawù Mukalenge Yesù, mu mubidi Wèndè mubiishìibwe ku lufù. “Citwikalà kî ncyànji kumwènèka to,” mwàkamba Pòlò, “kàdi tudi bamanyè nè netwikalè nè mubidi mufwànàngàne nè mubidi Wèndè Yèyè mwinè wà butùmbi awu, bwalu netùMumòne ànu mùdìYe amu.”

²⁴ Nè byanza byònsò byà kale byà minyèngù nè minyiinyi mitekètàngàne yònsò eyi nebijiminanganè mu bulenga bwà bunsongà. Nwènù balùme nè bakàji bakùlàkàji, nwavùlukaayi nè, nwènù . . . Eci ke . . . Aci, ke cimanyinu cyà cibùlà, bukùlàkàji bwènu abu. Kàdi mu dibìikà dyà ku lufù, kakwàkwikala cimanyinu nànsha cimwè cyà mpèkaatù to. Kàdi mbwà cinyi bùdì Nzambì munwenzè mùshindù wùdìYe mwenzè awu? Wàkakufikisha ku cikondo kampàndà, paùvwa nè bidimu bitwè ku makùmi àbidi nè bibidi, bidimu makùmi àbidi nè bisàtù apu, wèwè uvwa mu bwìmpè bwèbè butàmbe abu. Wèwè's uvwa udyà byàkudyà nè wenda upeta dikàndà, nè mubidi tumatuma, nè mùshindù úvwà umwènèka muntu wa bukòlè múvwà amu. Pashìishe, paanyimà pàà aci, udi ubanga kwela minyèngù, nwamònu's, lufù lùshikamamù. Kàdi, mu dibìikà dyà ku lufù, bukùlàkàji bwònsò nebùmushiibwè.

²⁵ Ndi ntàngila mwab'ewu muyiishi mukèsè wa kale nè mukàjèndè. Bàdi mu bidimu byàbò makùmi mwandamukùlù, ngèèla meeji. Mwanèètù wa balùme nè Mwanèètù wa bakàji Kidd, bàvwa bàyiisha Èvànjeeliyò pàmwàpa kumpàlà kwà mèmè kulediibwa; kàdi nyèwù nkàadi muntu mununu. Nènku ndi mubàmòne basòmbe mwab'ewu, babàka bakesè bàà kale, bàà mmwènèkelu wa ditalala. Nènku ndi ànu ngèèla meeji, nè, mu dibìika dyà ku lufù, mmwènèkelu wìkalabò nendè. Minyèngù yà kale ayi, nè byanza byà mùzakàla nè dizakala nè tunèkè, nè nsuki yà mvya ayi neyijiminè mu bulenga bwà bunsongà. Bidi bulelèlà bifuta bwà kusadila Mukalenge. Bidi nàнку bulelèlà. NetùMumòne, dìngà ditùkù.

²⁶ Ndi ndikonka Rosella Griffin ní ùdi kaaba aka. Mvwa njinga bwà kumufikisha ku dyambayè mwàkù kampàndà. Kanwàyì mukèsè uvwa mwondòpiibwe ànu ku . . . mwab'ewu, kùkaadi ndambù wa bidimu. Nènku aci's ncifwànyine kwambulwisha kanwàyì kampàndà udi kaaba aka. [Mwanèètù wa bakàji kampàndà mu disangisha ùdi wàmbe nè: “Mwanèètù Branham, yèyè's úvwa muyè kumbèlu mu dindà emu.”—Muf.] Bìvwa bikèngela bwà kwalukilabò kumbèlu mu dindà emu. Èyo. Bwalu bulenga be! Mvwa ngèèla meeji makèèlèlà dilòòlò awu nè bìvwa

bikèngela bwà mèmè kwikala mumwambile bwà kwambayè cintu kampàndà. Mvwa mufwànyine kucyénza, bu ngíkala mumanyè, nè ùvwa nè cyà kuya mu dindà emu. Bintu byàbùngì be bìndì ànu muswè bwà bantu bàà ku tabernacle kutèèleja.

²⁷ Mpindyewu, kùdikù muntu kaaba aka bwà kubàtijiibwa, mu dindà emu, mu màyi anyi? Tùmonèbi. Umwe, bàbìdì, bàsàtù, bànaayi, bàtaanu, bàsambòmbò, bu bàsambòmbò anyi mwandamutekète apa bwà kubàtijiibwa. Nè mudimu wà dibàtiiza newùlondè dileesònà dyà kàlaasà kàà Dyàlumingu edi.

²⁸ Mpindyewu, cibambalu cyà kàlaasà kàà Dyàlumingu bwà Mwanèètù wa bakàjì Arnold, bwà bânà bèndè bakesè abu, ncyumusha. Nènku netwìkalè ànu, bu wèwè mwà kuswà, Mwanèètù wa bakàjì Arnold, netwìkale ànu nè cyà kwindija aci too nè ku ditùkù dyàlondà, bwalu katwèna nè cibambalu bwà kàlaasà to. Nènku nèmbalè ndambù wa Mifùndu kaaba aka mu tusunsa tukesè emu, bwà bânà bakesè, nènku aci necibàpèèshe cintu kampàndà cyà bòbò kwelapù meeji, bòbò pààbò. Nè pashìishe mu dyàlumingu dilwalwà edi nenùtungunukè nè masangisha ènù à ciibidilu nè kàlaasà kàà Dyàlumingu. Mpindyewu, tudi baswè kwamba . . .

²⁹ Cìkwàbò cintu cìndi muswè kwamba mu dindà emu ncyòci eci. Mvwa—mvwa—mvwa mubàmbile bwà kabàcyènjì to, kàdi bòbò mbacyènzè, nànsha bìshi. Nwamònu anyi? Aci's cìvwa, mmulàmbù makèèlèlè dilòòlò wùvwa mulwè kùndì, nwamònu's, mulàmbù kampàndà. Mèmè kubàmbila bwà kabàcyènjì to, nwamònu's. Nènku bàvwa . . . Kàdi mbacyènzè, nànsha bìshi. Nènku pàvwà . . . Ncìvwa mucìmanyè to too nè pààngambìdì Billy nè mwanèètù wa balùme Doc ùvwa mumutwàdilawù, ku nzùbu kwèndè aku. Kàdi mèmè ncìvwa mwanjì kuwùbadika to, kàdi ndi ngèèla meeji nè mbalondè nè kùvwa bantu batwè ku nkàmà yìsàtù, anyi ndambù mukesè pamutù pàà nkàmà yìsàtù. Aci cìdi . . . Udi muvùlùke, Doc, nè cìvwa ncinyi anyi? [Mwanèètù Edgar Branham ùdi wàmba nè: “. . . makùmi àbìdì nè ìnaayi, dikùmi nè ìbìdì!.”—Muf.] Cìvwa ncinyi aci, mwanèètù? [“Nkàmà yìsàtù, makùmi àbìdì nè ìnaayi, dikùmi nè ìbìdì.”] Nkàmà yìsàtù nè makùmi àbìdì nè yìnaayi, dikùmi nè yìbìdì. Ndi nzwèla twasàkidila, wa manza tètè.

³⁰ Mpindyewu, ndi mupàtùke mu mudimu ntàntà mule. Aci nudi bamanyè. Nènku bu mùdì mufùndi wanyì mwìkalapù, anyi bàmwè bàà kùdìbo mwab'ewu mu dindà emu, mbamanyè nè mfrangà yìntù ntùùla, nànsha mèmè nsanganyiibwa penyì, ànu mwab'ewu kumbèlu, bìdì bìngangata ndola mipìte ku lukàmà ku ditùkù, byà bìrò byànyì nè bikwàbò bwà kutùma mishwàlà nè bikwàbò mu buloba bujìmà, mu ditùùlà dyà mfrangà.

³¹ Nènku ndi—ndi muswè kwamba nùnkù ewu, dinùkànkamika nwènù aba, nànsha nànkù. Bwà bùngì bwà bantu, aci's mmulàmbù mutàmbe bunène wùmwàkù kacya mupete kacya

bàndela. Nudikù nujingulula nè aci ncifwànyine kwikala bu ndola umwe ku muntu, ku yôyi myabanyina ku búngì bwà bantu anyì? Nè yàbúngì yà ku milàmbù yà mu mudimu yôyi myabanyina ku búngì bwà bantu yìtu bu, bu meeyà makùmi àbìdì nè àbìdì anyì makùmi àbìdì nè àtaanu ku muntu. Kàdi ewu ùvwa bu ndola umwe ku muntu. Bwalu, ndi mumanyè nè kanwèna mwà kubwela mùnwemu. . . Kabèèna bàngata milàmbù pambèlu apu to. Nènku kanwèna mwà kupàcika mu mwaba mukèsè ewu, kupicisha bantu bu nkàmà yisàtù to, ndi—ndi ngèèla mpatà. Ùdi umanyè búngì bùdì nkwasà yà mu tabernacle anyì, Mwanèètù Neville? [Mwanèètù Neville ùdi wàmba nè: “Bìvwa bikèngela kwikalayì búngì kampàndà bwipacila ku nkàmà yisàtù, mùshindù wùdìbi mpindyewu ewu.”—Muf.] Bantu batwè ku nkàmà yisàtù. Pa nànkù, nwamònu’s, abi’s mbiipacila ku—ku ndola umwè ku muntu. Nzambì mmumanyè mùndì ngàanyisha aci. Ndi nñwèla twasàkidila wa manza tètè. Nènku cidi cìbwela buludì mu mudimu wà Mukalenge. Ndi—ndi nñwèla twasàkidila bwà bwalu abu. Nè bwà. . . Bu byòbì mwà kwenzeka nè bàmwè bàà kùdìbo bìikalè bùumukè kumpàlà kwà dilòòlò, bwalu. . . nè mémè. . .

³² Pàndi mwalùkile kumbèlu makèèlèlè dilòòlò awu, mu lutanda amu mùvwa musòmbe kashèètè kakesè, nùnkù ewu, nè cìvwa mmusùmbà wa—wa komfitilè, Ndi ngèèla meeji nè, aci ncifùmine kùdì muntu kampàndà. Nudi bamanyè’s, mémè ntu ànu munangè komfitilè. Nènku ndi—ndi ngàanyisha aci. Nènku mwanèètù wa—wa bakàji kampàndà mwab’ewu, mbitàmbe bwìmpè ncitèèdi dínà dyèndè to. Mmulundà wa katàpùlà-katèèka wa dìkù dyètù, nè mmushiyè dipà dyà dinanga kwà mààmù, bwànyì mémè nè bwà Billy. Kwèna mumanyè to, mwanèètù wa bakàji, mùshindù wùndì ngàanyisha aci, nè ncikondo ciinè cìdici cilwè’s.

³³ Nènku, kaa, bintu byàbúngì be! Nudi nuumvwa’s. Nènku ndi mutwìshìbwe nè Yéyè ùdi ùmvwa. Nènku ndi ànu mutwìshìbwe nè Yéyè neàbeneshè yònsò wa kunùdì, byàbúngì byà bìyiila nè panshì. Mvwa kujinga bwà ngìkalakù mwà kwalukila kumbèlu nè yònsò wa kunùdì, nè—nè kushàalaku neenù katanci kakesè, nè kuyiikila neenù. Ntu munangè kwenza nànkù.

³⁴ Kàdi, cidi, s’nudi bamanyè mùdìbi, ànu mu lwendu dìbà dyònsò. Bikèngela ànu tuye nè lùkàsà lwònsò. Bwà kwamba menemene, ànu paanyimà pàà disangisha dilòòlò edi, bu Mukalenge mwà kwanyisha, nènshiyè ditùnga, ànu pàdì disangisha dijika nè dyàjikiè. Bikèngela mpatukè mwab’ewu kumpàlà kwà dìbà dikùmi nè ibìdì jaajaaja. Ndi nè cipungidi pa dìbà dikùmi nè ibìdì jaajaaja. Kàdi ndi naabì tètè, mu mapingaja emu. Nè ndi. . . Nudi bamanyè mùdìbi’s. Dìbà dyònsò bìdì ànu ku mwaba nè ku mwaba, dìbà dyònsò; bantu bàsaama, bàpùnga nè lufù.

³⁵ Nènku misangu yàbúngì yíntù mbwela mu mwaba

kampàndà, nè ngìmana ànu mwaba awu, nè muntu kampàndà ùbwela, wàmba nè: “Udi mummanyè anyi, Mwanèètù Branham?”

“To, ncyèna mumanyè to.”

³⁶ “Mòna’s, mvwa mulàale mu lùpitaadi, mpùnga nè lufù, pawàkalwà kunsambidila. Mukalenge mmungondòpe.” “Mvwa mpofo pawàkatwilanganà naanyi mu mùsèèsù, ditùkù adi cìkèèrà-kumòna kulwaci.” Nwamònu anyi? Nè ncìtukù—ncìtukù mumanyè nè ncinyi to.

³⁷ Kàdi ndi ngèèla meeji ku dyeji dibènèshùbwe edi, Mwanèètù Egan, dyà nè, dínghà ditùkù pangìikala muyiishè diyiisha dyànyì dyà ndekeelu, musambidile muntu wa ndekeelu udi Mukalenge muswè bwà mèmè kusambidila awu, nènku ndi ngàalukila Kumbèlu! Nènku mu dindà dyà dibìikà dyà ku lufù adi, kaa, nditùkù kaayi diikalàci’s, disànkà adi’s wè! Pàndi mwà kwimana Mwaba awu, pàajuukà mukalenge-mukàji wa ku Sud, ndi mwà kumòna bwenzeji bwàkapetaye! Nèmmòne Billy Graham, ùbanda kuntwaku nè bwenzeji bwàkadiye naabù abu. Oral Roberts, nè bakwàbò bònsò abu, ba Sankey, Finney, Moody, Calvin, Knox, nè bakwàbò. Pashiishe nèmmònè cisumbù cyànyì cìbànda. Kaa, aci’s necìikalè disànkà, necìikalè dyashiibwa dyànyì dyà cifulu cyà butùmbi. Ncyà bushùwà. Nènku, ku ngàsà wa Nzambì, ndi ntèkemena nè nengìikalè nè mìliyò yàbùngì Muntwamu.

³⁸ Kàdi mpindyewu bìdi bikèngela bwà nye dyàmwàmwà dyà mbù ànu àbìdì àdi panshì aa. Nènku mpindyewu, bwà ku dyànyì dimanya, ànu mu masangisha ètù sungasunga, anji elàayibi ànu meeji pa bwalu abu, mèmè ndi mu mùliyò wànyì mwibìdì wà misùukà, mpetela Kilistò. Nènku ndi—ndi ntèkemena nè ndi mmòna mìliyò yàbùngì, yàbùngì menemene yìpeciibwa.

³⁹ Mpindyewu, mudimu wà dibàtiiza, nè mpindyewu bi—bipungidi nè bikwàbò. Nènku, mpindyewu, eci citu ku musangu nè ku musangu paanyimà pàa disangisha.

⁴⁰ Dìbà kanà dyònsò dyùdì walukila bwà muyiiki wà bàbìdì wà pàa nkààyeebè, anyì bikwàbò, ubiikila ànu muntu udi mwab’ewu, Mwanèètù Mercier. Bidi bikèngela bwà twètù kwikala nè ndongolwelu wa mùshindù kampàndà, utùdì nè cyà kwikala nendè. Aci’s tudi bamanyè. Nè Mwanèètù Mercier, ùdi ùyifunda, ùdi ùyifunda ànu mùlwalwàbo amu, nènku pàndi ànu njikija bipungidi, bìjika byònsò, ndi . . . Pàndi ndwa, ndi mmubiikila mmwambila nè: “Ndi mujikijàngàne nè musumbà awu.” Yèyè ùdi ùmpèèsha musumbà mupyamùpyà, nènku ke mèmè uyààya cyàkàbìdì ewu, nudi numòna’s. Pashiishe, byònsò bìdi byènzekela ku bìrò abi. Nè yèyè mmumanyè ànu mwà kubàtèèka mu mùshindù wà nè yèyè ùdi mwà kubweja muntu nè muntu, udi mwà kubwelamù awu, nudi numòna’s. Pa nàнку, tudi nè disànkà dyàbùngì dyà

kwikalakù nè bìrò bikesè ebi bikwàta mudimu mùshindù wùdibi byènza ewu. Pa nàнку aci cidi ànu BUTler 2-1519. [Nomba wa tèlèfonè mmushintùlùdiibwe.—Muf.] Nènku aci's... Anyi, nwènù babiikile Jeffersonville, nùmbiikila ànu mèmè, nènku nebàndamunè ku bìrò aku. Nènku twasàkidilaayi, wa manza tètè.

⁴¹ Mpindyewu twanjàâyibì, kumpàlà kwà twètù kubuulula Díyi Dyèndè dibènèshiiibwe... Nènku vùlukàayi nè, dyàkàmwè paanyimà pàà disangisha edi dimanè kujika, nè mudimu wà dibàtiiza, Billy neikale mwab'ewu bwà kwabanya twartà twà disambila bwà dilòòlò edi.

⁴² Mpindyewu, bu mùdibi nè dilòòlò edi ndilòòlò dyà èkèleeziyà, dyàlumingu dilòòlò, bantu bààbúngì bàà mu cimenga emu nebiikalè mu èkèleeziyà yàbò sungasunga, nè mu nyùngulukilu wa Louisville nè mu nyùngulukilu mwónsò. Nebiikalè mu èkèleeziyà yàbò sungasunga. Kàdi nekwikalè ànu nangàngà bantu bàà pambèlu. Ki bwà cinyi, ndi ngèla meeji nè pàmwàpa tudi mwà kwelesha mulongo munènè wà babèèdi dilòòlò edi nè kusambidila muntu nè muntu wa kùdìbo. Ndi nè dyeyemena nè netùcyènzè. Tudi nè ndambù muvùumvùke wa twartà twà disambila tutùdi baabànye.

⁴³ Ndi—ndi ngèla meeji nè, makèlèlèlè dilòòlò, paanyimà pàà makèlèlèlè dilòòlò, kaa, mwà ànu mudyùmvwe bu nè mwà nè cyà kwenza lùmwe lwà ku ngendu ayi yà ubùuka nkàyeebè, kaa, nudi bamanyè's, yitùtù twamba ayi. Ànu bwà kumòna, mu kaatabernacle kakesè kàà kale aka, cyàkàbidì, byanza byela muulu.

⁴⁴ Ndi nè mwànà mukesè wa balùme kaaba aka, mmwànà wa balùme ànu menemene, Joseph mwànà. Ùdi ànu nè bidimu bitwè ku bisàtù cyanààna. Kàdi pàvwà bantu bònso munkaci mwà kwela mbilà apu, s'mmutùpìke ànu mwab'awu kudyèla munkaci mwà kajila nè kwela byanza muulu, nè kubanga kwela mbilà nè kutùmbisha Mukalenge, ànu munkaci mwà kajila mwàmwa's! Nènku ndi ngèla meeji, mu dindà emu nè, mbaabuundàngane yèyè nè mwanààbò wa bakàjì, ke kumusùmàyè mènù ku dibòkò, ki mèmè kumwambila nè dyela dyèndè dyà mbilà adi kadivwa nè bwà nsongo to pàvwàye ànu wenza maalu mùshindù awu. Kaa, èkèlekèle! Bàna bakesè abu, mùshindù mwinè ùdi mwà kubànanga's, kí mmwòmò anyi? Èè, mu bushùwà bwà bwalu, civwaci ncyà nè, ùvwa mumòne ànu mùvwa bakwàbò abu bàcyènza ke kwelayè meeji nè ke civwà cikèngelà bwà yèyè kwenza, pèndè, nè pàmwàpa wènda ùtùlonda, mùshindù wutùvwà twenza awu.

⁴⁵ Mpindyewu tudi nè Díyi Dyèndè ditèèka kaaba aka dibuulula. Mpindyewu twànjàayi kwakula Nèndè pa Dyòdi adi. Mpindyewu ànu...

46 Nzambi munanga, patùdì tulwa Kùdì mpindyewu mene apa, nè kaneemu kònsò, nè ditalala dyònsò, nè didipwekesha dyònsò, nè mu diitabuuja, biikàle twitabuuja nè Wèwè udi umvwa nè newàndamunè ku disambila. Bwalu, tudi tulwa mu Dìna didi dikumbàne mu byònsò dyà Mwan'Èbè, Mukalenge Yesù, Udi kàyì mwà kupangila awu, nè mufile mulayi, nè: “Nwènu balòmbè Taatù cintu kanà cyònsò mu Dìna Dyànyì, Mèmè nèncyènzè.” Dìbà adi tudi tumanya nè netùpetè ànu citùdì tulòmba aci, bwalu tudi tulwa mu Dìna Dyèndè. Bwalu katwèna nè Dìna dikwàbò ditùdìku bafwànyine kuseemenamù Kùdì, Yèhowàh Nzambi munène, wa bukolè awu to. Nènku tudi tulwa mu ngàsà Wendè, katùyì tutonda nè tudi tukumbanyina cintu nànsha cimwè to, kàdi mbwalu Yèyè wàkatwènzela difuta dyà cibawu, mu kutùfwilà Kwèndè. Nè Wàkafuta cibawu bwà mpèkaatù yètù, nè tudi tuumvwa nè tudi mwà kwimana babingìshìbwe ku mèsù Kwèbè, ku lufù Lwèndè. Ke diitabuuja dyètù ndyòdì adi. Nè katùyì tulòmba cintu nànsha cimwè cidì cifwànyine kwikala cibi to, kàdi cidì cifwànyine kwikala cimpè bwà muntu nè muntu wa kutùdì.

47 Ki bwà cinyì, Mukalenge Nzambi, akùlàku neetù ku Dìyì Dyèbè. Nènku akùlàku neetù mu Dìyì adi, bwà twamònakù mwà kuumvwa nè kumanya menemene mwà kwikala balùmè nè bakàjì, bàna bàà balùmè nè bàà bakàjì batàmbe bwìmpè. Bamanye nè ciibi cinène ku lufù kwàka, nè, musangu wònsò wùdì mwoyi wètù wùtuuta, tudi ànu tutàmba kuseemena pabwìpì nè ciibi aci kutùyaaya bònsò kabwela. Nè dìbà adi bamanye, nè, paanyimà pàà twètù babwelemù, kawkwèna mpùngà nànsha wumwe kàbidì wa kwenza dipungijangana to. Kakwènakù kàbidì mùshindù wutùdì mwà kwikala nè mpùngà wutùdì ànu nendè mpindyewu ewu to. Nè katùyì ànu bamanye nè ndìbà kaayi ditwàsambuka mulongo awu, Èyì Nzambi wa yààya, lwàkù kutùdì lùkàsàlùkàsà nè tùfikìshèkù ku byumvwilu bìvwà bikèngelà bwà twètù kwikala naabi, nè kumanya mwà kuseemena pabwìpì Neebè, nè bwà kutèndakeenakù bwà bwalu bwètù kumpàlà Kwèbè nè kulòmba luse. Enzàku nàнку, Mukalenge.

48 Tudi cisàmbà cidì mu lukèngelu. Tudi mìkòòkò, munkaci mwà kubìikila Mulami wa mìkòòkò wìkala mwà kutùlombola mu mwoyi wètù, nè kupweka kupìcila mu cibandabanda cyà mundidìmbi wà lufù. Bu mwàkamba Davidì, wa kale awu, nè: “Ncyàkucìinakù to pàngààfikà pa kaaba aku,” bwalu Mulami wa mìkòòkò neàndombòlè buludi kupìcila mu mwaba awu, too nè mwìmanà makàsà ètù mashìndàme pa Mwelelu wà màyi wà butùmbi awu, mwìkalà bukùlákàjì nè mabèèdì nè tunyinyanya nè lufù mwà kunyeema kutùdì, nè twètù netwìkalè badìshìkàmìne, Mwàmwa, bwà kashidi.

49 Akùlà, Mukalenge. Munanga mukesè wa twìsù túbàlakana wa muntu kampàndà ewu, udi musòmbè kaaba aka kumpàlà

kwànyì eku, mu dikalù dyà balèmà edi; ncyèna ànu mwà kuumusha mèsù àànyì pa yéyè leelù ewu to; mucibwila yònsò panshì kùdì tunèkè, cìdì mubì ewu mumwenzèle. Éyì Nzambi, twàlakù disungidiibwa kùdì munanga mukesè awu. Enzàku nànkù, Mukalenge. Kí ng'ànu kùdì yéyè to, kàdì nè kùdì bakwàbò kaaba aka bàdì bindìle. Nyumà Mwimpè Webè àbàbàndishè kuulu menemene, mu dindà emu, bwà nè nebàpitè dizakala dyònsò dyà mpatà nè cipùmbishi cyònsò cyà mpèkaatù, bwà Nyumà Mwimpè Webè wàmòna mwà kukwàta mudimu pambidi pààbò nè kubòndopa. Enzàku bintu ebi, Mukalenge. Bwalu tudi tulòmba mabènesha aa bwà butùmbi Bwèbè, mu Dìna dyà Mwànà, Yesù Kilistò. Amen.

⁵⁰ Mpindyewu, ndi musungùle bu cyena-bwalu mu dindà emu. . . Nènku nwènù bânà bakesè nùmfwilaayikù luse, bwà kupicisha dībà dyònsò nè bakùlumpè, nè kàlaasà kèènú kakèènakù mwab'ewu to, bwà mu dindà emu. Kàdì ndi muswè bwà nwènù kutèeleja, nwènù pèènú, cìndì muswè kubala aci. Nènku ndi muswè kubala, mu dindà emu, mu Samwèlè wa Kumpàlà, nshapitá mwi3.

⁵¹ Nènku ndi muswè kwangata bu cyena-bwalu nè: *Tèèlejà Dìyì Dyèndè*. Cìikala mwà kukùmbana bwà bânà bàà bakàjì batekète nè bàà bakàjì bakolè, nè bânà bàà balùme batekète nè bàà balùme bakolè, bònsò. Vùlùkaayi cyena-bwalu aci nè: *Tèèlejà Dìyì Dyèndè*.

⁵² Mpindyewu, nwènù bàdì munkaci mwà kubuulula mu Mifùndu abu, kùdì Samwèlè wa Kumpàlà, nshapitá mwi3, mùshindù ewu ke mùdìci cìbadiibwa bwà mvensà dikùmi yà kumpàlà ayi.

Nènku mwànà awu Samwèlè ùwa ùkwàcila MUKALENGÉ mudimu kumpàlà kwà Elì. Nè dìyì dyà MUKALENGÉ òvwa dyà mpùùkàpùùkà matùkù awu; kakùvwa cikèèná-kumòna cyà patòòke to.

⁵³ Kaa, mùshindù mwinè wùndiku mufwànyìne kujinga kunèngakù mwab'awu bwà katanci kakesè, pàmwàpa musangu kampàndà mukwàbò. Cìdì ànu cìdengà's. Ndekèlaayi ncibalè ànu cyàkàbidì musangu wùmwè, mvensà awu.

Nènku mwànà awu Samwèlè ùwa ùkwàcila MUKALENGÉ mudimu kumpàlà kwà Elì. Nè dìyì dyà MUKALENGÉ òvwa dyà ku mpùùkàpùùkà mu matùkù awu; bwalu kakùvwa cikèèná-kumòna cyà patòòke to.

⁵⁴ Nudi numòna cìdì cikèèná-kumòna nè ncinyì anyì, dībà adi? N'Dìyì dyà buludi dyà Mukalenge. Nwamònu anyì? Nè Dìyì dyà Mukalenge òvwa dyà ku mpùùkàpùùkà.

Nènku byàkenzeka mu cikondo aci, pàvwa Elì mudyòlòle panshì pa kaaba kèndè, nè mèsù èndè mabange kubwicidila, mu mùshindù wà kàciyì mwà kumòna to;

Nè kumpàlà kwà mwéndù wà Nzambi kujimawù mu ntempèlu wa MUKALENGE, mùvwà mushèètè wà cipungidi wà Nzambi wùsanganyibwa, nè Samwèlè mulàadìle pànshì muye mu tulù;

Nè MUKALENGE wàkabùkila Samwèlè, nè yèyè kwandamuna nè: M'mémè ewu.

Ke kuyayè lubilu kùdì Eli, nè kwamba nè: M'mémè ewu; bwalu wèwè udi mumbùkile. Ke yèyè nè: Ncyéna mukubùkile to; nda ukalààle pànshì cyàkàbìdì. Ke kuyayè nè kudyòlola pànshì.

Nènku ke MUKAL- . . . Nènku ke MUKALENGE kubùkìlayè cyàkàbìdì Samwèlè. Ke Samwèlè kubùkìla nè kuya kùdì Eli, nè kwamba nè: M'mémè ewu. . . M'mémè ewu; bwalu udi mumbùkile. Ke kwandamunayè nè: Ncyéna mukubùkile to, mwanàanyi; nda ukalààle pànshì.

Mpindyewu Samwèlè kàvwa mwànji kumanya MUKALENGE to, anyi dīyī dya MUKALENGE kadivwa dyanji kumubuulwila to.

Ke MUKALENGE kubùkìlayè cyàkàbìdì Samwèlè bwà musangu mwisâtù. Ke kubùkayè nè kuyayè kùdì Eli, nè kwamba nè: M'mémè ewu; bwalu udi mumbùkile. Nènku Eli kujingulula nè MUKALENGE nguvwa mubùkile mwànà awu.

Ki bwà cinyi Eli kwambila Samwèlè nè: Nda, ukalààlè pànshì: nènku nebùkalè nè, yèyè mukubùkile, nè wèwè newàmbè nè: Akulà, MUKALENGE; bwalu musadidi webè ùdì ùtèèleja. Pa nàнку Samwèlè kuyayè nè kudyàdijayè pa kaaba kèndè.

Ke MUKALENGE kulwa, nè kwimana, nè kubùkila bu misangu mikwàbò ayi, Samwèlè, Samwèlè. Ke Samwèlè kwandamuna nè: Akulà; bwalu musadidi webè ùdì ùtèèleja.

⁵⁵ Dīyī dya Nzambi! Kutèèleja Dīyī Dyèndè mu ditùkù adi cīvwa cintu cyà ku mpùùkàpùùkà. Nwamònu's, kakùvwa cikèèna-kumòna cyà patòòke to. Kàdi cīvwa ncintu cyà mpùùkàpùùkà, Dīyī dilelèlè dya Nzambi, bwalu bantu bàkaavwa bayè kule naaDi. Bàvwa nè èkèleeziyà, mu ditùkù adi, uvwa kàyì ànu ùlonda mèyì matùma à Mukalenge to. Bàvwa nè—nè mwambi kampàndà dīnà dyèndè Eli. Nènku yèyè ùkaavwa muyè kule nè Nzambi, mu kulongesha kwà tunungu ànu twà cīvwa bantu baswè kwitabuuja aci. Pùikalà aci ní kī ncifwànàngàne nè ditùkù edi's! Wàkalongesha bantu ànu, nè yèyè—yèyè wàkenza disungula dyèndè, nènku ùvwa ùlekela bānà bèndè bàà balùme bāngata munyiinyi wà mutàmbe bwimpè kuntwaku, mutwa ku nsomò, mu—mu mulàmbù amu. Nènku kulwaci ànu mwaba kampàndà wùvwà mulàmbù mushààle cintu cyà mushinga. Nènku Samwèlè, kàyì nè ntèmà bwà

mùshindù wùvwàye ùtùmikila mèyì matùmà à Mukalenge. Nè Dìyì dilelèlè dyà Nzambi òvwa dyà mpùùkàpùùkà.

⁵⁶ Mùshindù awu ngùdìbi leelù ewu. Tuyààya mu èkèleeziyà nè tujandula nè bantu bàyaayamù nè biikàle nè kàmwè kabingilà kanene nè: “Tudi baswè kuvwija òngumba dyètù, cidimu eci, *ditàmbe* bunène bikolè. Lwàkù nè mukàndà wèbè mukufùndila wà ku èkèleeziyà wèbè mukwàbò awu, bwà kudisanga neetù.” Nè bifidi byà nè: “Mùliyò mukwàbò mu cidimu cyà 44.” Nè byònsò byà mùshindù awu abi, bèèla mbilà, bàteeta bwà kudyunda kupita òngumba dikwàbò adi. Nè mu kwenza kwà nànkù awu, tudi bashiye biibi bwàshì, bwà Bible. Tudi bayè kule, nè babangè kulongesha bintu bishiilèshiiilàngàne.

⁵⁷ Bapròfeta bààkaakula bwà matùkù aa, nè pàvwà: “Bòbò, bwà dilongesha, nebàlongeshè dilongesha dyà muntu kàdi kaciyi Dilongesha dyà Nzambi to.”

⁵⁸ Nè tudi bamòne byàbùngì byà bwena abi, nè mbitùngùnùke nànkù ntàntà mule, mu mùshindù wà nè, leelù ewu, Dìyì dyà Mukalenge ncintu cyà mpùùkàpùùkà, bwà muntu mwà kulwa kwamba nè: “EMU MMÜDÌ MUKALENGE WAMBÀ.” Mpindyewu, tudi bapete ditentula bùngì cyanàànà dyà aci. Sàtaanà ùdi bushùwà mu mudimu. Nènku bidimu byàbùngì bishààle ebi, bantu bàvwa nè bwòwà bwà kwamba aci bu kaciyi cyà kùdi Mukalenge to. Kàdi, leelù ewu, kabèèna ànu bàbicyùka to. Kàdi’s ncintu cyà ku mpùùkàpùùkà bwà kutèeleja Dìyì dyà Mukalenge, nè kupeta muntu udi mwà kwamba nè: “Mukalenge mmwakùle naanyi.” Nudi numòna aci munkaci mwà bantu, kàbìdi, mu mùshindù wà nè mbikolè bwà bòbò kuumvwa cikondo cidìbo bàmba nè: “Mukalenge mmwakùle naanyi.”

⁵⁹ Pàvwàbi nè, balùme nè bakàji bàvwa nè ciibidilu cyà kusambila bufùku bujimà, nè nzùbu yàbò mitèeka mu bulongàme, ku Mukàndà wà Mukalenge, nè Nzambi ùvwa nè mwaba wà kumpàla mu dikù dyàbò.

⁶⁰ Nwamònu’s, tudi nè bintu bipite bùngì kumpàla kwà Mukalenge. Kwèna mwà kwenza disangisha dyà milòmbò to, bwalu Mukalenge Godfrey ùdi ku tudyòmbà dilòlò edi. Kanwèna mwà kwenza disangisha dyà milòmbò to, bwalu *Tudi Banangè Susie* ùdi ku tudyòmbà dilòlò edi. Anyi, bintu kampàndà byà lukutukutu byà mùshindù awu, bìdi byàngata díbà, nè katwèna nè díbà dyà kutèeleja Dìyì dyà Mukalenge to. Nènku aba bàdi bàlaka mukana bàmba mùdìbo beena Kilistò abu, bàdi ànu bàtwa binù panshi, bwà disambila dikesè bu edi nùnkù, dyenze bu dikwàtakajila mu nzùbu nè: “Mukalenge, mbènèshèku mèmè nè dikù dyànyì, nè tükùbekù. Dilòlò dilenga.” Nènku pàcyacyàbo mu dindà, ùjuuka wàmba nè: “Tulombòlèku ànu mu ditùkù dijimà emu. Ditùkù dilenga.”

61 Bivwa bikèngela bwà twètù kwikala bindile Mukalenge. Nudi numòna's, tutu twenza dyakula dyònsò. Katùtu tuMupèèsha mpùngà wa kutwàndamuna to. Bwà nè, bu twètù mwà kusambila, nè kusambila too nè pààbwelà musùùkà wètù mu Bwikadi bwà Nzambi, nè pashìishe kudilekelela ànu cyaààà nè kutèeleja Dìyi Dyèndè.

62 Kàdi kùdi mèyi búngi cyaààà, leelù ewu, àdi uumusha Dìyi dyà Mukalenge kutùdi. Kùdi dìyi dyà bisànkasanka. Bantu bààbúngi bàdi munkaci mwà kutèeleja adi, mwaba wùdìbo mwà kuya bàpìcila mu cikondo cyà dicyònkomoka. Nè bààbúngi bàà kùdìbo bàdi bàmba mùdìbo beena Kilistò. Kùdi bidundadundà byà kale byà mùshindù kampàndà bìlwa, kabèena ànu mwà kutèeleja byà diciinà dyà Nzambi to. Bàdi bàmba nè: “Èè, mèmè's ndi mwena Kilistò, s'bvwa bikèngela bwà mèmè kubala mvensà kampàndà mu Bible leelù ewu. Eyowà's: 'Yesù wàkadila mwadi.'" Kwàjiki's. Bàkèba kwà kuya bàya. Kàdi pashìishe bwà bapweka bulelèlà panshì nè kusambila, bàdi nè bintu bikwàbò bipite búngi byà kwenza. Kùdi mèyi búngi cyaààà pa buloba, bintu búngi cyaààà bwà kukòka ntèmà yètù kuyùmusha kùdi Nzambi.

63 Nè makèèlèlà awu, patùvwà mèmè nè mukàjàànyì bayè ku makàjiinyì à byàkudyà, bwà kusùmba ndambù wa byàkudyà. Nè mvwa ndwijakaja bwalu mvwa mushààdile paanyimà nè bipungidi nè bikwàbò, nènku mvwa ngèza ne lukàsà lwònsò. Nè kùvwa mwànà wa balùme kampàndà muteketè mwimàne mwaba awu, ùbùnga nè tulù, nè kànà kàà bakàji kakesè kàà kale kulwilakù mwaba awu kalwàte kàpanù kakesè, kàvwà kàà muntu mulùme kampàndà. Bivwa nè cyà kwikala nànkù, bwalu kàvwà kenza bwà muntu mulùme.

64 Nè Bible ùdi wàmba nè: “Ncinyangu ku mèsù kwà Nzambi, bwà muntu mukàji kubilwàtayè.”

65 Nè bilaabu byà ku mishìku búngi cyaààà, nè mèsù èndè bu malààle bu matàbàle, kwambayè nè: “*Cikampàndà* cidi penyì?” wàmbara mwànà wa balùme mukèsè awu.

Awu nè: “Mmunyi mùdi utèkemena bwà mèmè kumanya?”

66 Kwambayè nè: “Vùluka nè, ncìvwaku mwalùkile kumbèlu to too nè ku díbà ìsambòmbò jaajaaja mu dìndà emu.” Pèndè kàyì nànsha nè bidimu bipite pa dikùmi nè bìbìdì to.

67 Mpindyewu, Yesù, pàvwàye nè bidimu dikùmi nè bìbìdì, uvwa cileejilu cyètù awu, wàkamba nè: “Kwèna mumanyè nè bivwa bikèngela bwà mèmè kwikala mudìfile ku maalu à Taatù Wanyì anyì?”

68 Kabyèna bikèmesha to mùdi Dìyi dyà Nzambi diikàle cintu cyà ku mpùùkàpùùkà leelù ewu. Ndi pàcisha kùdi mèyi àbúngi mashìilèshìilàngàne, bintu búngi cyaààà bìdi bìdìpùwisha nè bìdìyùmusha. Mbikafikè mu mùshindù wà nè bìdi bìpàcisha byumvwilu byètù, mu mùshindù wà katùyi mwà kutèeleja Dìyi

dya Nzambi to. Byumvwilu byètù, byà mùvwàbi bikèngela bwà twètù kudinyùkusha, nè kufika ku dyumvwa nè nudi balume nè bakàji, nè nudi bufùki bwà Nzambi, nè nuvwa batèèkiibwe mwaba ewu bwà kuMukwàcila mudimu. Kàdi dìyi dya Sàtaanà nè baprófeta bàà mashimi nè: “Kaa, ikalà wa cyena leelù’s!”

⁶⁹ Ànu múmvwà ngàakula kùkaadi ndambù wa matùkù, mvwa ndwa mu èkèleeziyà, ke mémè kukàngula cisanji cyànyi. Ki mémè kuumvwa ndongamu kampàndà wa mu Louisville, wákamba nè bàvwa bàlongesha bàna bààbò, mu maèkèleeziyà, bwà kunwàku ànu nè dicincika. Bàbàvwija bàà cyena leelù, mu mùshindù wà nè kabèèna bàkafika ku dipicisha to.

⁷⁰ Kaa, bìvwa bikèngela bwà kubàlongesha Kilistò, kí nkunwa to. Nènku aci’s necinyangakajè nè kupiisha diiku kanà dyònsò edi. Mmunyi mùdiku Dìyi dya Nzambi mwà kwakula munkaci mwà dîkù didi dikwàcike nè maalà à wiskí, nè meeji ààbò manyangakaja kùdi mwíshì wà mfwankà nè dinwà dya maalà, ma fetè à butùku bujimà?

⁷¹ Bantu bàdi bindilà Nzambi, bàdi bàbwela mu Bwikadi Bwèndè. Nènku kubwela mu Bwikadi bwà Nzambi mbyenze ànu bu kupàtuka kumpalà kwà dîbà mu dindà, pàdi lumuma nè bilòngo biikàle byònsò byà kalolo. Paùdi ubwela mu bwikadi bwà muntu wa mùshindù awu, udi umanya nè ùvwa nè Nzambi.

⁷² Mukàjàànyi kungambilayè, patùvwà twenda tupweka, mu dindà emu. Yèyè nè: “Billy, ncyèna muswè kwamba eci bwà kwela muntu kampàndà cilòngò to. Kàdi,” mwàkambàye, “makeèlèlè dilòlò awu,” ngeèla meeji, anyi dimwè dya ku malòdòlò, yèyè nè: “Mvwa musòmbe ku luseke lwà umwe wa ku bakàji bakesè bàà ba-Amish, nè inàbànzà mutekète muvwàle kafulu kakesè ku mutù.” Yèyè nè: “Nè bìvwa bìmwèka patòòke nè mukàji awu ùvwa nè Yesù, bwalu ùvwa nè kalolo. Musùùkà wèndè ùvwa mupòle. Mésù èndè àvwa matòòke.” Kakùyi mpèkaatù anyi cintu nànsha cimwè cyà kusokoka paanyimà to, anyi ní ncinyi cyònsò. Ùvwa mu Bwikadi bwà Nzambi. Byumvwilu byèndè kabivwa bicipàle, kùdi maalà à wiskí nè mfwankà wa cipàtu, nè bintu byà mshindù yònsò byà pa buloba to. Ùvwa mupetè cyashima cyà mu Bwikadi bwà Nzambi, ùbala Bible wèndè, ùlonga Dìyi dya Nzambi.

⁷³ Kàdi, twètù beena Àmèrikè bàà cyena-leelù aba, citùdi twenza’s wè! Nè baprófeta bàà mashimi paanyimà pàà cyambilu bàmba nè mbîmpè. Ndi bu udi nè meeji à kwamba eci nùnkù. Mémè mupùile, Nzambi àmfwilèku luse. Ndi mutwishìbwe nè bààbùngi bàà kùdìbò kí mbamanyè Nzambi to. Nè disangisha kadyàkwikalakù nè nsòmbelu mutùmbùke mutàmbe wa mpaasàtá wadi to. Kabyèna bikèmesha to mùdi Mufundu wàmba nè: “Balami bàà mikòòkò aba, mùshindù mwinè wùdìbò batangàlaje cisumbù cyà mikòòkò’s! Dyàkabi

dyàbò. M'matàmbà àdi kaàyi àkwàma mamuma, ikala mwà kukòshiiibwa nè kwoshiibwa.”

⁷⁴ Bintu byàbùngì be bwà kupàcisha byumvwilu byà bantu leelù ewu's! Kaa! Kàdi munkaci mwà biine byònsò abi, nànsha mùdiku dipàcisha dyònsò nè dīyì dyònsò didiku mu buloba leelù ewu adi's! Àmwè à ku ôwò, mmèyi à bisànkasanka. Àmwè à ku ôwò àdi—àdi mèyi à mpèkaatù, bwà kuseeswisha bantu. Kàdi pamutù pàa kantu nè kantu kàa cyòci aci, Bulelèlà bwà Nzambi bùcidi ànukù nè: “Ewu watèèleja Dīyì Dyànyì nè wàNdonda awu's!” Balùme nè bakàjì biikalà mwà kutèèleja Dīyì dyà Nzambi: Nzambi ùcidi ànu mwindile bwà kwakula nè muntu nkààya yònsò wàkàngula maci èndè bwà kuumvwa Dīyì dyà Nzambi.

⁷⁵ Muntu mulùme, nànsha mwikale nganyì, nè mpaasàtà... Misangu yàbùngì, bantu bàtu bàmba nè: “Kwèna mwà kwenza *cikampàndà* anyi? Kwèna mwà kulwa lùbilu *apa* anyi? Kwèna mwà kwenza *cikansanga* anyi?” Kaa, mèmè ndi munangè kucyèenza. Kàdi bikèngela nshaalè mu Bwikadi bwà Nzambi pangìikalà nè cyà kwenza cintu mùshindù cijaalàme. Dìbà adi bantu bàdi bàmba nè: “Kaa, Mwanèètù Branham ngumwe wa ku baa cyenda-nkààya aba.” Kì nnànkù to. Ntu munange bantu, kàdi kùdi ànu binunu nè binunu byàbò's. Kàdi ndi nè cyà kushààla Nendè, bwà kujandula cidiYe muswè bwà mèmè kubàmbila. Mu mwaba kampàndà, tèèleja ànu cyanààna, Yèyè neikalè nè cintu kampàndà bwèbè wèwè, cidiYe muswè bwà wèwè kumanya.

⁷⁶ Mpaasàtà, kwikadikù nè midimu mipitepìte bùngì bwà wapanga mwà kushààla mu Bwikadi nè kutèèleja Dīyì Dyèndè to. Nzambi ùtu misangu yònsò ànu ùshààla mukwàte ku Dīyì Dyèndè. Nènku nànsha bikondo mwà kwikala bibi byà bishi, nànsha èkèleeziyà wenù mwà kulongesha bibèngangana nè cyòci aci, Yesù Kilistò ùcidi ànu muswè kwakula kaaDīyì kakesè kapolè aku kùdi muntu kanà yònsò udi muswè kuMutèèleja awu. Yèyè ùcidi ànu mudilongòlòle bwà kucyèenza, bu twètù ànu mwà kutùkija.

⁷⁷ Kàdi tudi tubwelamù, tulubakana, twamba nè: “Amba tǔng, mpaasàtà, ndikù mwà kashààla wa mu èkèleeziyà ewu anyi?”

“Udi mufùmìne mu èkèleeziyà kaayi?”

“*Kampàndà.*”

“Èè, tùtwàdila mukàndà wèbè awu.” Kaa, èkèlekèle!

“Ndikù mwà kashààla wa mu èkèleeziyà ewu anyi?”

⁷⁸ “Kaa, èyowà's. Bànda kumpalà eku, nènku netùkumyaminè nè màyi ndambù, nè kufùnda dīnà dyèbè mu mukàndà. Nènku bàdi bàkwela mwoyi ku cianza wà buonyàna.”

⁷⁹ Èè, Diswa dyà ba-Franc-maçons s'didi nè bulongàme bwímpè kutàmba abu. Mbulelèlà. Diswa dyà ba-Franc-maçons

nè maswa makwàbò ónsò kaenà nè bwalu to, kàdi kabyèna ànu nzùbu wa Nzambi to. Amu ki mùdi Nzambi wàkula. Maswa awu àdi àteeta kukuvwija wa nsòmbelu mulenga, kàdi Nzambi ùdi ùkuvwija mwakàne ku Yesù Kilstò, Mwan'Èndè. Mpindyewu, kùdi tunungu twà dimanya dyà nsòmbelu bwà cyòci aci; Nzambi ùdi nè Dilediibwa dipyadiya bwèbè wèwè.

⁸⁰ Kàdi tèelejàku kaaDiyi Kèndè kakesè kapolè aku. Yònsò wa kunùdi nwènu bàdi bàjikula nè nudi beena Kilstò abu, ditèèkà mupùwe kumpàlà Kwèndè. Kùlekedikù disukula dyà bilàmbà dikupangisha to. Kùlekedikù mudimu wùkupangisha to. Kùlekedikù kantu nànsa kàmwè kàkupangisha to. Kùlekedikù muntu nànsa umwe ùmánya cyùdi munkaci mwà kwenza to. Ndà ànu kumpàlà Kwèndè. Bànda mu diitu mwaba kampàndà. Pàtukà uye ku mpengà kwà njila. Bwelà mu kazùbù kàà cisokomenu nè winjilè ciibi. Pàdi bânà mu kàlaasà apu, twàku binù muntwamu. Udi mumvwè mèyi à mìshindù yònsò myaba yònsò, kàdi pwekà panshì nè ùshaaleku too nè pààpùwà mèyi awu nènku ùbangè kubànda. Aci's necikushintùlùlè. NeCikuvwijè mushiilàngàne, mwàkenzelàCi Samwèlè mutekète amu. NeCikwenzèle cintu kampàndà bu wèwè ànu mwà kucyènza. Mpindyewu, neCikuvwijè civwà cikèngela bwà wèwè kwikala aci. NeCikuvwijè mwena Kilstò wa mùshindù wùvwà wùkèngela bwà wèwè kwikala awu.

⁸¹ Mpindyewu twàlukilàayi ku ditùkù dyà cyena-leelù edi, too nè ku ditùkù didi dipite adi. Twàlukilàayi ku matùkù à bikondo byà ku cibangidilu awu. Nè Dìyi dyà Nzambi edi ndilwè kùdi bantu mu mìshindù yònsò yà mwoyi, mu bikondo byònsò. Nànsa wèwè mwikàle cidimè, nànsa wèwè mwikàle mwenji wa bisàbaatà, cyònsò cyùdi mwà kwikala aci, Nzambi ùcidi ànu wàkula. Wèwè mwikàle ngènzàmpèkàatù, wèwè mwikàle mukàji wa masandi, ndumbà, wèwè mwikàle kanwàyì wa maalà, wèwè mwikàle (cinyi?) cidimba cyà èkèleeziyà wa pa kaaba, cyà ku dìnà—cyà ku dìnà, cyònsò cyùdi mufwànyine kwikala aci, Dìyi dyà Nzambi dicidi ànu dindile bwà kwakula neebè.

⁸² Ndi ntùma meeji mpindyewu kùdi Mòsà, pàkaavwàye nè bidimu makùmi mwandamukùlù apu, nè ùvwa nè bidimu makùmi mwandamukùlù byà dilongeshiibwa dyà tèolòji. Nè yèyè ùvwa mumanyè Mifundu; ùvwa muYimanyè bimpè. Nè yèyè ùvwa nè mulayì kùdiye nè, yèyè nguvwa nè cyà kwikala musùngidi wa cisàmbà cyèndè. Kàdi, nànsa nànkù, mumanyè ànu Mifundu nè mwikàle cidimba cyà—cyà mmwènekèlu wa kwisùkwisù cyà èkèleeziyà wa cyena leelù awu mu ditùkù adi, yèyè kwangata cintu aci mu byanza byèndè sungasunga nè kuteeta bwà kucyènza. Kushebeyayè mwena Èjiipitù. Udi mumòna cyùdi wenza paùdi kùyi utèeleja Nzambi anyi? Udi ànu ubisòpakaja.

⁸³ Nènku pàdi dyabùlù, mu dindà emu, mufwànyine kwamba nè: “Kubàtijiibu to.” Mukwàbò ùvwa mufwànyine kwamba nè:

“Kaa, enza nàнку pashìishe.” Umwe mmufwànyine kwamba nè: “Mbìmpè wikalè mutwìshìibwe nè udi mumanyè cyùdi wenza.” Kàdi mukwàbò wàmba nè: “Neùjimijè cikondo cìmpè.” Mùshindù wùmwèpelè wà kulongolola cyôci aci, ngwà kuya naaci ku Diyì dyà Nzambi. Kàdi bantu, leelù ewu, kabèèna bàmwèka bu nè mbaswè kwenza nàнку nànsha.

⁸⁴ Nènku, Mòsà yèyè, ùvwa muyè kùdi baa laabi bàà batàmbe bwìmpè, kàdi bôbò abu bàvwa bàà mmwènekèlu wa kwìsùkwìsù nè bakwàtè mashìka. Ùkaavwa mutèèlèje bwalu-bulonda bwàkamulondelà mamwèndè, mwàkadiye musokoka mu malèngà, nè mùvwà ngandù yà minène menemene ayi kayiyi mwà kumulèngakù to. Mùshindù mene wùvwà mwànà mukèsè wa mu dibòkò awu, wenda upweka mulèlème pa musùlù apu’s. Mwaba wùvwà. . .

⁸⁵ Ngandù minène yà kale yìvwa ànu midyundè. (Eci mbwà bàna bakesè.) Yìvwa midyundè, bwà didyà dyà bàna bakesè abu. Bàvwa nè bakàji bakolè bàà maùlù makòbàme, bampùlushi bakàji, bàvwa kacya kabàyiku balelè mwànà to, kabàyi bamanyè nè dinanga dyà mwànà ncinyi to. Mòna’s, bàvwa bàpàtuka kuntwaku bàbàngata nè bàshipa bàna bakesè bàà mu mabòkò abu, nè bàbìimansha mu musùlù amu. Ngandù minène mikùlàkaji ayi yìvwa ànu midyundè, bwà mùvwàyi yìdya bàna bakesè abu.

⁸⁶ Kàdi, nànsha nàнку, Nzambi kutèèka pa mwoyi wà maamù bwà kutèèka mwanèndè wa mu dibòkò awu mu lufù. Kanwènaayikù numòna nè cìvwa cìfwànyikijilu cyà Kilistò anyi? Yèyè wàkabwela buludi mu lufù. Nè yònsò wa ku ngandù minène ya kale awu ùvwa ànu mwà kubanda too nè ku kasakà kakesè kàvwà kènda kàpweka nè musùlù aku. Nudi bamanyè bwà cinyi kayìvwa mwà kucyènzà, bwà cinyi kayìvwa mwà kudya mwànà mukèsè wa mu dibòkò awu anyi? Kwàkadi Mwanjèlò musòmbè mwaba awu. “Umùkaayi apa.”

⁸⁷ Bwà cinyi? Nzambi ùtu ùtùmina Banjèlò Bèndè diyì bwà kutàngilabò bantu Bèndè. Kùcìinyikù to, munanga wanyì. Nzambi ùdi munkaci mwà kukutàngila. Dyabùlù ùdi mwà kuteeta bwà kukwenzela cintu kampàndà, kàdi Nzambi mmutàmbe bunène. Nwamònu anyi?

Pa nàнку, ngandù minène ayi yìvwa nè cyà kunyeema kuya kule nè kàtungà kakesè aku.

⁸⁸ Kàdi, nànsha nàнку, Mòsà ùvwa mumanyè bintu byònsò ebi. Kàdi, nànsha nàнку, paanyimà pàà bidimu makùmi ànaayi byà dilongesha, nè pashìishe mu cipèèla, yèyè ùcìvwa ànu ùteeta bwà kwàngata cintu aci, mu byanza byèndè.

⁸⁹ Tudi bamanyè Bible, cidì Nzambi wàmba bwà kwenza, kàdi pèètù twamba nè: “Èè mpindyewu, netwènzè nè eci cìikalè mùshindù kampàndà, cidì ànu nè, matùkù à bishimà, kaènakù kàbìdì nàнку to. Tudi bamanyè nè katwèna twitabuuja nè tudi

tubimòna kàbidì to, nè tudì twitabuuja nè matùkù à bishimà àkaadi mapite. Nè dimyaminangana dyà màyi ndimpè ànu mùdì diinyijangana dyà mu màyi amu. Nè ‘Taatù, Mwànà, nè Nyumà Mwímpè’ mbímpè ànu mùdì Dìnà dyà Mukalenge Yesù amu. Pa nàнку netwikalè ànu. . . Bakwàbò bónsò nebiikalè bàya mùshindù awu, pa nàнку netwikalè ànu mwà kucyenza, twètù pèètù.”

⁹⁰ Mòsà’s wàkadi mùsàlaayi. Ke kudyàmbidilayè nè mùshindù wùvwàye mulongèshìibwe awu, bu mwàkadiye mùsàlaayi, nè ùvwa ànu mwà kushebeya beena Èjiipitù abu nè cyanza cyèndè. “Bivwa mwà kwikala bímpè ànu mùvwà cyàkenzà Nzambì aci.” Nukààdikù bakwèlèlè meeji anyi? Bantu bónsò bàdi bàpiisha Mòsà bwà kushipa kwà muntu umwèpelè. Kàdi kwalukilaye kuntwaku nè dilaabiibwa dyà Nyumà Mwímpè nè kushebeyayè cintu cyònsò mu kaabujimà, kakùyì muntu nànsha umwe ùfyotola mukana to. Wàkashebeya cilwilu cyònsò cyà Pâlò aci, kàdi Nzambì ùvwa mu bwalu abu’s. Nzambì kàvwa mu bwà dyàmbedi abu to.

⁹¹ Ke pashiishe Mòsà, mupàte ànu tètè nè tèlòlòjì wa èkèleeziyà awu, yèyè’s ke uvwa nè cyà kwikala pâlò uvwa ulonda. Nènku tudì tumusangana, kàyì ànu mumanyè Nzambì to.

⁹² Kàdi dindà kampàndà, lwà paanyimà pàà cipèèlà pààpa, muntu mununu wa mvùla makùmi mwandamukùlù, mwedi wèndè mulembèlèlè panshì, wàkamòna cipuka cilàkuka kapyà. Ke kukudimukayè bwà kumòna cìvwa munkaci mwà kwenzeka. Nènku mmwenzè ànu usemena pabwipi nè cipuka aci, kuumvwayè Dìyì. Bivwa bikèngela bwà Nzambì kumutuuyishayè munda mwà bidimu makùmi ànaayi, kumpàlà mene kwà kwakulaYè nendè. Kàdi twètù katwènakù tushààla batùùkije mu tusunsa dikùmi, bwà Nzambì wàmònakù mwà kwakula neetù to, nè mutooyi wònsò nè mbimbimbì bitùdi naabi mu ditùkù edi abi.

⁹³ Kàdi nànsha nàнку, Mòsà, paanyimà pàà bidimu makùmi ànaayi, mwimàne mwaba awu, nè mu Bwikadi bwà cipuka aci. Nènku Dìyì dimwèpelè dyàkamubiikila adi, yèyè wàkamanya byàbùngì pa bwalu bwà Nzambì mu tusunsa tùtaanu, paanyimà pàà cyòci aci, kutàmba bidimu byònsò makùmi mwandamukùlù byà dilongesha byàkamulongeshabo abi. Cyàkamuvwija muntu mushiilàngàne.

⁹⁴ Necikuvwijè muntu mulùme nè mukàjì mushiilàngàne, bu wèwè ànu mwà kushààla mupùwe ntàntà bule bukùmbàne bwà kutèèleja Dìyì Dyèndè, mwàkenzà Samwèlè amu. Shààla mupùwe. Kùsaluku to. Wèwè muswè cintu kampàndà cyà kùdì Nzambì, uMulòmbè; pashiishe shààla mupùwe nè utèèlejè, ùmòne ciikalàYe mwà kwamba pa bwalu abu. Kàngulà wèwè ànu mwoyi wèbè cyanàànà, wamba nè: “Kàdi bishi bwà aci, Mukalenge Yesù?” Shààla wèwè ànu mwaba awu. Yèyè kàyì

mwandàmùne mu mèbà àtaanu à kumpàlà awu to, dībà adi indilà makwàbò. Yèyè kàyì mwandàmùne leelù ewu to, dībà adi neÀndamunè mààlabà. Yèyè kàyì mwandàmùne lumingu elu to, Yèyè neàndamunè lumingu lùlwalwà elu. Shàalakù too nè pàdìYe wàndamuna.

⁹⁵ Tèèlejà Dìyì Dyèndè dyàndamuna, munda mwà mwoyi wèbè, dyàmba nè: “Èyowà, Mémè ndi Mukalenge udi ukwondopa.” Dībà adi kwònsò kwàjiki. Wèwè udi mwà kukòsa bwalu dībà adi. Nwamònu anyì? “Mémè ndi Mukalenge Udi ufwa luse ku mpèkaatù yèbè yònsò. Mpindyewu ndaaku kwènjì kàbìdì mpèkaatù to. Mémè ncyèna nkupìisha nànsha.” Dībà adi udi mwà kuya mudìshikàmìne. Udi bímpè. Kàdi mbímpè wìkala mutwìshìibwe nè udi mùmvwè Dìyì adi dyàkula. Mòsà wàkaDitèèleja. Yèyè’s ùvwa muntu mushintùlùke.

⁹⁶ Tàngilàayi Yeshàayi, mupròfetà awu, bu nsongàalùmè, byònsò bìvwa byènda bímpè bwèndè yèyè, mfùmù munène mwanyìshìibwe Uzìyà awu, mu matùkù awu, muntu mwakàne, muntu mwímpè, ùvwa munangè Yeshàayi, bwalu ùvwa mumanyè nè ùvwa mupròfetà. Nè pa nàнку yèyè ùvwa mweyèmène ànu pa dibòkò dyà mfùmù. Cyònsò civwàye muswè aci, mòna’s, Uzìyà wàkamupèeshaci. Nè musangu wònsò wùvwàye ùkèba cintu kampàndà, mòna’s, mfùmù mwímpè awu ùvwa mwà kumupèeshaci. Kàdi kulwakù cikondo cyàkafwà mfùmù awu.

⁹⁷ Ditanta dùtu misangu yònsò ànu dinyanga bantu. Aci’s ncintu cicolè bwà kwamba. Kàdi ditanta dùtu dìseemeja muntu kule nè Nzambi. Nzambi wàkaakula kaaba kampàndà, mu Bible, cintu kampàndà cyà bwen’eci, nènku Wàkamba nè: “PaNgààkakubèneshà, nè kukupèesha bintu byàbùngì. Paùvwà mupèlè nè kùyì nè kantu nànsha kàmwè to, Mémè kulwa kùdì, nè wèwè kuNtèèleja nè kuNkwàcila mudimu. Kàdi pàNgààkakubèneshà nè kukupà tètè mu nzùbu tètè pambèlu, ke wèwè kuNkoma nyimà.” Aci’s ke cìdì Àmèrikè mwenze, batàngile kwà cyanààna.

⁹⁸ Ke cìdì èkèleeziyà myenzè’s. Nudi mwà kusòmba mu masangu, nè kwikala nè nzùbu minène milenga, nè mìliyò yà ndola ku . . . kutèkamù, nè byònsò ànu bipepèlè nè mwàbì mwònsò. Kabyèna bikèmesha to mùdì kùyì nè dībà dyà kutèèleja Dìyì dyà Nzambi. Kàdi indilà too nè pàalwà dībà dìdì aci cyùmushìibwa, dībà adi neùjinge bwà kuDitèèleja. Byònsò bìdì ànu bímpè mpindyewu’s, kàdi dībà dilwalwa diikalàbì kabiyì mùshindù awu to.

⁹⁹ Pa nàнку, Yeshàayi, ùvwa mwà kweyemena pa dibòkò dyà mfùmù. Nè yèyè ùvwa nsongàalùmè mwanyìshìibwe, nè kùvwà nyumà mulenga mu nsongàalùmè ewu, pa nàнку ke mfùmù awu kumunangayè. Kàdi dìmwè ditùkù, byeyemenu kuumunyèngiibwabi. Mfùmù awu kufwà. Nènku pàakafwà mfùmù, dībà adi byàkakèngela bwà Yeshàayi kwendayè

nkààyendè. Ke pashiishe kubangayè kukènzakana, ke kusanganayè nè muntu yònsò kàvwa bu mfùmù awu to.

¹⁰⁰ Nenwìpaciibwè, dimwè dya ku matùkù àdì panshì aa, mu bisùmbù byà pankaci pàà màngumba byà mùshindù ewu ebi. Nekùlwe cikondo cyàkèngelabi bwà nwènù kwikala bàà mu bulongolodi kampàndà, cyanaàna kanwèna mwà kukuukwila to. Bu munùdì bamanyè's, Mifundu yìdì yàmba nè nebìikale nànkù. Mpindyewu's bàdì ànu banwèlulwila cyanàana. Kàdì nekùlwe cikondo cìikalàku dyanzejangana dya ku makàndà, bwalu cimanyinu cyà nyama wa lwonji cìdì nè cyà kulwa. Anyi nenùkashàale bàà mu nsangilu wa maèkèleeziyà, nyama wa lwonji ànu mùdìbi mu Loomò amu, anyi kanwàkukuukwilakù to nànsha kakesè. Aci's ke cìdì Mifundu yàmba. Dìbà adi's ke dìikalàbi bikèngela bwà wèwè kwela mbilà mwàkenzà Yeshàayi amu.

¹⁰¹ Ke kupwekayè mu ntempèlù, nè kufikayè ku dyumvwa dìbà adi's. Kwelayè byanza byèndè muulu è kwambayè nè: "Éyì Mukalenge, mèmè ndi muntu wa mishikù mibiipe." Wèwè udi wela meeji nè udi mwìmpè, kàdì indilà too nè pàalwà cikondo aci. "Ndi musòmbèle munkaci mwà bantu bàà mishikù mibiipe." Cyàkenzaye ncinyi? Wàkashiikila.

¹⁰² Nènkù dìbà dyùdì ushiikila bwà cintu eci, cintu kampàndà necyènzekè. Kwèna mushiikile menemene to. "Kaa, èè, mèmè's ndi mukashàale wa mu èkèleeziyà. Aci's ncikòse bwalu." Kàdì bikèngela wikalè mushiikile bwà bwalu abu. Bikukèngela bulelèlèlè ùjinge ànu Nzambì.

¹⁰³ Yesù wàkamba nè: "Bàà disànka ng'aba bàdì nè nzala nè nyòòtà yà bwakàne, bwalu bòbò nebùjiiibwè."

¹⁰⁴ Kàdì paucìdì ànu musànkishìibwe nè bintu byà pa buloba, mmunyi mùdì Nzambì mwà kwakula neebè? Wèwè udi wamba nè: "Nzambì kacya kí mmwakùle naanyi to." Bwà cinyi? Yèyè mmuswè nànkù. Kàdì wèwè udi mùle tètè menemene nè bintu byà pa buloba. Ke lutàtù lutùdì naalù leelù ewu ndwòlò alu. Tudi tutèeka dìbà dyètù dyònsò pa bintu byà pa buloba, nè bisànkasanka byà pa buloba, kàdì katùyì tupèèsha Nzambì dìbà to. Mbulelèlèlè.

¹⁰⁵ Mpindyewu, tudi tujandula nè Yeshàayi wàkashiikila. Ke kwelayè lubilà lukolè, nè kutundayè mpèkaatù yèndè, nè kutundayè mpèkaatù yà cisàmbà. Pààkajikijàye kutonda, kuumvwayè mutooyi kumutù kwèndè aku. Nènkù pààkabàndulukàye, ke Bakèlùbà abu's, bàpaapala bàtwa kumpàlà bàtwa paanyimà mu nzùbu amu. Mapwàpwà mabwikile kwisù Kwàbò, nè mapwàpwà mabwikile pa makàsà Àbò, nè bàbùuka nè mapwàpwà, bèèla mbilà nè: "Wa cijila, wa cijila, wa cijila, Mukalenge Nzambì wa Bukolè bwònsò."

¹⁰⁶ Cintu kampàndà cìvwa munkaci mwà kwenzeka. Yeshàayi wàkashiikila. Nzambì wàkaditwa mu mudimu. Ke Yeshàayi

kwelayè lubilà lukolè nè: “Ndi nè mishikù mibiipe,” bwalu Dìyi dicivwa ànu difùma ku dyakula. Dyàkamushintulula.

107 “Wàya kaaba Kèètù nganyi?” mwàkambà Dìyi adi. “Nganyi wàya? Nganyi udi muswè kwimana pankaci, munkaci mwà musùmbà wà beena tèòlòji ewu? Nganyi wàya mu ditùkù edi, nè kwamba nè Mémè ncidi ànu Nzambi? Nganyi wàya kapiisha bukooya bwàbò? Nganyi wàpandulula màngumba àbò nè kwibaka cyàkàbidi makolè à Nzambi udi nè mwoyi? Wàya nganyi?”

108 Yeshàayi wàkamba nè: “Mukalenge, kumpàlà kwà mémè kuya, bikèngela ngiikalè mushintùlùdiibwe.” Bùmwe bwà ku bwòwà bukesè nè dilubakana bìvwa nè cyà kumushiila kaaba.

109 Ke mwikalàbi kàbidi bwà muntu nkàaya yònsò udi Nzambi ùbiikila ewu’s! Bikèngela ùlediibwè cyàkàbidi, mushintùlùke nè muvwiibwe mupyamùpyà. Kí ndidifwànyikijila to; kàdi byà byumukila munda mwà mwoyi wèbè, cintu kampàndà cidì cyà bushùwà cyènzeka. Nè umwe wa ku Banjèlò... “Nwènu balòmbe, nenùpetè.”

110 Umwe wa ku Banjèlò wàkaya ku cyoshelu cyà cyamù cyà mitakù, nè kwangata nkwatù nè kwolola cyanza kwangata dikàlà dyà Kapyà kàdi nè mwoyi, nè kuya lubilu kùdi Yeshàayi nè kuditéeka mukana mwèndè. Yèyè nè: “Mpindyewu udi mukezùke. Ndàaku, akula Dìyi.” Yeshàayi wàkashintuluka paanyimà pàà yèyè mumanè kuumvwa Dìyi adi.

111 Pashiishe mu bidimu byèndè byà ndekeelu, wàkafùnda Bible mujimà, wàkabangila ku Genèsè nè kujikijila mu Bwàkabuulwibwà; kùdi Mikàndà makùmi àsambòmbò nè yisambòmbò yà Bible, kùdi nshapità makùmi àsambòmbò nè yisambòmbò yà Yeshàayi. Bwà cinyi? Bwalu wàkashiikila mu cikondo cyàkamònàye bitàmbe kujingiibwa bikolè.

112 Danyèlè mu Baabùlòònà mwàmwa, bu mutwàkùdi bwalu bwèndè makèlèlè dilòlò awu, ùvwa mudipàngàdikile munda mwà mwoyi wèndè bwà nè kàvwa mwà kudikooyisha nè malongesha à cyena Baabùlòònà to. Kàdi dīngà ditùkù, muntwamu, Danyèlè wàkapeta dijinga. Nè yèyè ùvwa mumanè nè ùvwa muswè kutèeleja Dìyi dyà Nzambi, kàdi pèndè’s ùvwa nè Mifùndu. Kàdi bìvwa bimukèngela bwà kutèelejayè Dìyi dyà mukana dyà Nzambi. Nè kupwekayè ku musùlù *kampàndà*. Kàdi kàakapweka ànu kuntwaku nè kwimanyika ditempu dyèndè nè kutwà binù panshi mu malèngà amu, kwamba nè: “Mukalenge Nzambi, ndi muswè kuKutèeleja. Udi penyi?” To. Kwèna ucyènza mùshindù awu to. Yeshàayi wàkangata ditempu dyèndè, nè bendeshi, nè kupwekaye ku musùlù aku nè kubàalujayè. Ùvwa nè cyà kushàala too nè pàakatèelejaye. Ke mùshindù ngwòwò awu. Wàkashiikila bwà bwalu abu.

113 Byàkakèngela bwà kuumukayè kùdi bàsàlaayi bònsò, nè balongi bàà mabùlunga bònsò, nè beena meeji abu, balongeshi

bônso bàà tèòlòjì, nè bikwàbò, bàvwà bàteeta kumwambila nè: “Eci! Enzà *cikampàndà*, Danyèlè. Enzà *cikansanga*, Danyèlè.” Kàdi yéyè wàkaya kule nè byônso abi. Ke mùshindù wùdibi bikèngela bwà wèwè kwenza awu’s. Ke kupwekayè ku musùlù aku, nè kushàalayè kuntwaku munda mwà matùkù makùmi àbìdì nè òmòwè, ùlwàngana mvità nè Mwanjèlò wa Mukalenge.

114 Kàdi mbatwámBILE nè yéyè wàkatàngila pamutù pàà màyi. Wàkamònapù Mwanjèlò mwimàne, nè dikàsà Dyèndè pa buloba bùme nè pa mbù. Nè wàkeela byanza Byèndè muulu nè kudicìpa kùdì Ewu udi nè mwoyi kashidi nè kashidi awu nè: “Pìikalà bintu byàkadì Danyèlè mumòne mwà kwenzeka, cìkondo kacayàkwikalakù kàbìdì to.” Wàkanèngeshiibwa munda mwà matùkù makùmi àbìdì nè òmòwè bwà bubì bwà buloba abu.

115 Nènku pìikalàbì nè Yéyè wàkanèngeshiibwa munda mwà matùkù makùmi àbìdì nè òmòwè bwà bubì buloba abu, mu matùkù à beena Peelèsà, ncinyì cìdìYe mwà kwikala mu ditùkù edì’s? Mu ntàntà bule munyì mùdìYe mwà kunèngeshiibwa’s? Kàdi diitabuuja dìdì kadiyì difwa adi, nzala ayi nè dìjinga mu mwoyi wà muntu, dikalà kadiyì dibèngela Nzambì to, kàdi diikala mwà kushààla ànu kacya dyàkwàta too nè pàdì Nzambì wàkwila mu Dyulu. Kanwèna mwà kunàya nè eci, nè Èvànjeeliyò ewu to. Kì ngwa dinàya Nèndè to. Údì nè cyà kulenga cìdì cimuludikila, misangu dikùmi pa dikùmi. Bikèngela cìikalè cipwàngàne, bwà cyanàànà kí ncilelèlè to nè kacya kùkùmbanakù to. Bikèngela cìikalè cipwàngàne. Danyèlè wàkasambila.

116 Tudi tusangana mu Bible, lwà mu nshapità wa 8, nshapità wa 7 anyì wa 8 wa Mukàndà wà Byenzedi, nè, Mufaàlèsà mukèsè, wa mudyènze yéyè mwìnè dyèndè nè Shaùlà. Kaa, yéyè’s ùvwa mwena tèòlòjì, èyo. Wàkadì mushikàme mu dilongesha dyà Gamaliyèlè nè wàkadì nè Mifùndù yònsò, ànu mùshindù wùvwàbì bikèngela, bilondèshilàngàne nè beena tèòlòjì bàà ditùkù adi, kaa, wa wèndè mùshindù nè mudyènze nkàayèndè. Kè kumònayè bantu bènta cintu kampàndà cìvwà cyà nyumà, kàdi tèòlòjì wèndè mukwàtakaja kùdì bantu awu kàvwa ùpetangana naaCì to.

117 Ndifwànangana kaayìpu nè leelù ewu’s wè! Wa kweyemena nè wa meeji matòoke mu mwoyi wèndè, ànu mùdì bantu bààbùngì amu, bàdì bèèla meeji nè bantu bàdì balediibwe cyàkàbìdì mbapàle. Bàdì bèèla meeji nè dyondopa dyà kùdì Nzambì nè makolè à Nyumà Mwìmpè ncintu kampàndà cìdìbò *bàakula*, kàdi’s ncilelèlè.

118 Nènku pàvwàye mu njila mutàngile ku Damàsèkè, dìngà ditùkù, mwikàle nè mèyi matùma kampàndà mu mpaaya mwèndè, à kùdì—à kùdì mwèpiskòòpò wa èkèleeziyà, bwà kupwekakù nè kubùtula musumbà wònsò wà bansantu babùnguluki bàà mu malaba bàvwà bèèla mbilà mikolè nè

bèèla mikunda abu, nè—nè bàtùpika bàya muulu bàalukila, nè bààkula mu myakulu yà ku baabèndè, nè—nè bwondopa babèèdi. “Nènku, mòna’s, s’mmusùmbà wa badémóns,” mwàkamba beena tèòlòjì. “Pwekaku ùbàkwàtè, nè ùlwe naabò mwab’ewu beela ku nkànu!”

119 “Bushùwà. Ku mudimu wèbè ànu muwǎmbì amu, mwèpiskòpò!” Kaa, ekèlekèle! Kaa, yèyè’s ùvwa muntu munène. Ùvwa nè D.D., Ph. D., nudi bamanyè’s. Ke yèyè kutupikayè pa kàbalù kèndè, nènkù ke yèyè uyààya wàwa, nè bantu bàkamufilà.

120 Kàdi mu njila wèndè amu, lwà mu nkànkàlà, Cintu kampàndà kumbyànkula mu malaba. Nè kubùngulukayè mu lupwishi bu mutombòke, lututu ku mishiku. Ke kutèèlejaye Dìyì dyàmba nè: “Shawùlà, Shawùlà, udi uNkengsha bwà cinyi?” Cìvwa ncinyi Aci? Kì mmwena tèòlòjì kampàndà munkaci mwà kwakula nendè to, kàdi n’Dìyì dìfùmina mu Dyulu nè: “Udi uNkengsha bwà cinyi?”

121 Ke kubùngulukayè mu lupwishi amu, nè nkòfi yèndè yìvwa yònsò myùle tètè nè lupwishi, nè binsònjì bìmupwekela pa matàma, pàmwàpa, Yèyè nè: “Mukalenge, Wèwè udi Nganyi’s?” Kàdi mmwenze ànu ùpòdya, ùlwa mpofo ànu mùdì mudimà amu.

122 Ke Dikunji dyà Kapyà dinène adi diimàne kumpàlà kwèndè adi, nè Dìyì dyumùkilaKù dyàmba nè: “Mémè ndi Yesù Ùdì ukèngsha awu. Dilongesha dyèbè dikwàtakaja kùdì bantu adi òvwa dyà mafi.” Cìvwa ncinyi aci? Kùvwa cìkèènà-kumòna cyà ku cyàbwàshì, Dìyì dyà Nzambì òvwa òvwiijibwe dilelèlà.

123 Kaa, bàna bèètù, ke cìdì cìtùkèngelà leelù ewu, mbikwàbò kàbìdì byà mùshindù awu.

124 Ndi muswè ànu kusàkidila Mukalenge. Bàna bakesè bàà bakàjì aba, mu tùkalù twà balèmà makèlèlè dilòòlò awu, mbalwè leelù, biikàle bènda, nè kabàyi nè tùkalù twà balèmà to, ke bòbò bàyaaya bàba. Uh-huh. Mukalenge ànùbènèshè, nwènú bàna bàà bakàjì, bàdì basòmbe mwaba awu abu. Cìdì cicyènzè ncinyi? Yesù umwèumwè wàkaakula mu Dìyì ditàmbe-mfùkìlu kale wàwa awu, ùcìdì ànu wàkula leelù ewu.

125 “Shawùlà, Shawùlà, udi uNkengsha bwà cinyi?” Shawùlà ùvwa muntu mushintùlùke.

126 Nènku bìvwa bìkèngela bwà bantu bàshintulukè leelù ewu pàdìbo mwà kumòna nè kutèèleja Dìyì dyà Nzambì udi nè mwoyi dyàkula bu mwàkènzàYe pààkèndelàYe mu Ngalèlà apu. Kaa, bushùwà’s!

127 “Shawùlà, Shawùlà, udi uNkengsha bwà cinyi?” Cyàkenza cinyi? Yèyè kuya nendè ku sèminèrè kampàndà nè kumulongesha tèòlòjì mupyamùpyà kampàndà anyi? Tò, Yèyè kààkenza nànkù to. CyàkenzaYe ncinyi? Wàkaakula nendè, nè kùvwa Dìyì dyena

diinà dyàkwila mu Ditutu. Cìvwa ncinyi? Nzambì umwèumwè wàkakungula pa Mukùnà wà Sinàayi awu.

¹²⁸ Mu masangisha, mu myaba mùdi Nyumà Mwímpè ùlwa cyà bushùwà, nutu nuumvwa díyì dyà muntu dishintùlùke. Wà bwalu kàyi nànsha mene mumanyè, ABC to, kàdi Kilistò ùdi mwà kwangata díyì adi nè kwakula maalu masokoka à Nzambì wa Bukolè bwònsò. Bivwa bikèngela kushintululaci mulùme yònsò nè mukàji yònsò udi musombe mu Bwikadi Bwèndè...?..."Mémè kutèeleja Díyì," mwàkambàye. Kaa, twètù's tudi tutàmba kubùnga tulù. Ndi ntekemena nè, kacýàkukèngela kutàmba kutòkeshiibwa kupita apu to. Kàdi tudi tutàmba kubùnga tulù mu èkèleeziyà yètù, mu tèòlòji wetù, mu ngeelèlù wetù wa meeji, nè mu mìshindù yètù yà nsombelu, too nè mutùdi tupanga kutèeleja Díyì adi pàdiDi dyàkula.

¹²⁹ "Kaa," mùdibo bàmba, "ncifwànyine kwikala lubùkù. Ncifwànyine, nudi bamanyè's, ncifwànyine kwikala cikampàndà, cikansanga, anyi cikankènga."

¹³⁰ Ambaayi bi tũng bu nè Mòsà mwà kwikala mwambe nè: "Amba tũng, ndi ndikonka aci ní cìvwa démon mu cipuka aci?" Huh! Mòsà kàakeelakù mpatà to, yèyè wàkatèeleja Díyì adi.

¹³¹ Wèwè wamba nè: "Kaa, ncifwànyine kwikala ànu kondo kàanyi kàa mwoyi kàdi kàngambila nànkù."

¹³² Pawikalà mwànà wa Nzambì, neumanyè nè n'Díyì Dyèndè. "Mikòòkò Yànyi yidi yùmvwa Díyì Dyànyi. Mikòòkò Yànyi yidi yùmvwa Díyì Dyànyi." Neyimanyè.

¹³³ Kùvwa mukwàbò, dìnà dyèndè Peetèlò, wàkasungidiibwa, nè mùle tètè nè Nyumà. Kàdi yèyè ùcivwa ànu muswè kushàala kacya wàkwàta ku bilèlè byà bakùlù. Cyònsò cìvwaye mufwànyine kumanya, cìvwa mwà kwikala kaaba aka mu Díyì. Kàdi dīngà ditùkù, ku cisàsà cyà kuulu cyà nzùbu kampàndà, pàakaswaye bwà kulamina bilèlè byà nè: "Kùdi... kùdi munyiinyi nànsha wùmwe to, nè nsabatu, nè bikwàbò." Kùcidi ànu bantu bìmpè bàabũngi bàcidi ànu bàteeta bwà kushàala kacya bàakwàta ku bintu byà mùshindù awu.

¹³⁴ Kàdi dīngà ditùkù pàvwaye ùsanganyibwa ku cisàsà cyà kuulu cyà nzùbu awu, kutèelejayè Díyì kampàndà dyàmba nè: "Kùbìikidi cīNdi mukezùle nè: 'ncikooyike' to."

¹³⁵ Nzambì, ndi njinga bwà Àngatèku musumbà wà bayiishi mu cibandabanda eci, bwà kubàfikisha ku dimanya nè katwèna bapàlè to, twètù katwèna bansantu babùnguluki bàà mu malaba to, musumbà wà bùcyafù nànsha. Eci n'Nyumà wa Nzambì udi nè mwoyi. Nènku balùme nè bakàji aba mbakwàcike nè bwímpè Bwèndè. Kí mmupongo anyi lubùku to. N'Nyumà wa Nzambì udi nè mwoyi. Tàpulukàayi nè bilèlè byènù, bakùlù, nè tèelejàayi Díyì dyà Nzambì udi nè mwoyi. NeCikushintùlùlè. Kwàkulwa umwe wa ku bakèngeshanganyi abu to. Neuswe bwà kwikala umwe wabò. Bu wèwè mwà kusambuka mikàlù yà

malongesha èbè ònsò, too nè pawikalà mwà kwowela kubwela nè mu Bwikadi Bwendè mwàmwa, cintu kampàndà necyènzekè. Kwàkwitabuuja nè matùkù à bishimà àkaadi mamananè kupìta nànsha. Newitabuuje nè bìdi ànu kaaba aka mene, bwalu cimwè necikwenzèkelè, bushùwà, bwà kushintulula muntu kampàndà. Ke citu Dìyì dyà Nzambi dyènza misangu yònsò ncyòci aci. Dìtu dishintulula balùme nè bakàji nè dibàvwija cìvwà cikèngela bwà bôbò kwikala aci; kí ncìdi bilongelu nè balongeshi babàvwije nànsha, kàdi cìdi Nzambi mubàlongòlwèle.

Dìyì adi, dyàkula's! "Mémè kutèèleja Dìyì."

¹³⁶ Kaa, mùshindù mwine wùndi mufwànyine kujinga kubwela mu malabula à sungasunga's wè. Nè mùshindù mwine wunùdiku bafwànyine kunanga bwà kuya ku majaadiki à pàà nkààyeenù's, bààbúngì bàà kunùdi nwènu balùme nè bakàji bàkaadi batèèlèje Dìyì Dyèndè.

¹³⁷ Nènku ndi mwà kuvùluka pàmvwà muDitèèlèje pàncìvwà ànu mwànà mutekète wa balùme, kwínshì lwà mu mikùnà yà mu Kentucky mwàmwa. Kàdi mémè kudyàmbidila nè Cìvwà nyuunyi musòmbè mu mucì, kàdi nyuunyi awu kubùukayè kuya. Yèyè nè: "Kùcìinyi to, bwalu newikalè mwà kuumuka kaaba aka dīngà ditùkù, nè newikalè mwà kusòmbela pabwìpi nè cimenga cìdi cibìikidiibwa nè New Albany." Mémè kutèèleja Dìyì Dyèndè pàakambàYe nè: "Kùnu mfwankà, anyi maalà, anyi kùnyangi mubidi wèbè nè bakàji nè bikwàbò to. Kùdi mudimu wà wèwè kwenza pawàkolà."

¹³⁸ Kaa, Yèyè ùcìdi ànu Mukalenge Nzambi umwèumwè awu. Nènku nudi nuMuumvwa, ku dībà nè ku dībà, wàkula neenù mu kazùbù kèenù kakesè kàà cisokomenu aku, mu cibambalu cyènu cyà disambila amu. Ùpàtukila kumpàlà kwà batèèleji, pashìshe wàkula bantu bitàngìle. Dìyì dyà Nzambi, Dìvwà dyà mushinga mukolè mu matùkù à Samwèlè. Dìdi dyà mushinga mukolè be leelù ewu. Bwalu, kakùvwa cikèenà-kumòna cyà pa bùtookà to.

¹³⁹ Peetèlò wàkatèèleja Dìyì adi, nè Dyàkashintulula tèlòlji wèndè yònsò awu. Wàkaya buludì too nè kùdi bàà Bisàmbà byà bendè, bàvwayè ùdyàmbidila nè mmusùmbà wà bantu bapangi babèngiibwe. Kàdi, Dìyì dyà Nzambi, kí ndilongesha dyèndè to, Dìyì dyà Nzambi udi nè mwoyi dyàkamushintulula.

¹⁴⁰ Nènku mpindyewu ànu mukwàbò kàbidì. Kwàkadi muntu mwìmpè, musangu kampàndà, mu Bible. Mwibidilàngàne nè Yesù, uvwa muMunange, nè muMwitàbùùje, nè ùMukuukwila, nè banàye Nèndè, nè bayè Nèndè mu tukùnà atu, nè bapweke nè ku musulù, wènda ùlòba Nèndè. Ùvwà muntu mwìmpè. Dīngà ditùkù, pàvwà Yesù mumane kuya apu, lufù kulwalù kwìba mu cibambalu cyèndè.

¹⁴¹ Pèndè ùkaavwa mushiye èkèleeziyà wa ngiitàbijilù wa kale, yèyè nè bàna bààbò bàà bakàji bananga, Màrtà nè Màriyà. Nènku bàvwa bapàtùke bwalu bàvwa baMunangè, nè

baMwitàbùuje nè Yéyè ke Maasiyà awu. Kàdi mu kwenza kwà nàнку awu, èkèleeziyà wàkabiipata nè lùkàsà lwónsò.

¹⁴² Ke nsongàalùmè ewu kusaamayè mu mùshindù wà nè wàkafwà nè kufwà, nè wàkajiikiibwa, matùkù ànaayi kupita. Mbwîmpè kaayi bùdi malongesha à tèlòlǝjì bufwànyine kwenza díbà adì's? Mbwîmpè kaayi bùdi èkèleeziyà wendè mwà kwenza díbà adì's? Kàdi kùvwà Dìyì dyà Nzambì, pa buloba, nè Yéyè kwakula nè Lazàrò. Nènku Lazàrò, muntu uvwa mufwè nè mubole mu lukità amu awu, kuumvwayè Dìyì Dyèndè, nè kupàtuka nè kwikala cyàkàbìdì nè mwoyi.

¹⁴³ Mvwa mufwè musangu kampàndà, mu mpèkaatù nè matomboka. Nuvwa bafwè mu mpèkaatù nè matomboka. Kàdi cìvwà n'Dìyì dyà Nzambì dyàkamba nè: "Lwàyi kùNdi, nwènú bònsò bàdi bàkwàta mudimu mukolè nè bambùle majitu makolè, Mémè nènnpèèshè diikisha."

¹⁴⁴ Nkààdikù mumòne Dìyì dyàkula nè muntu mucibùkile panshì, òimwimanyika kuulu. Nkaadi mumòne Dìyì dyà Nzambì dyàkula nè mpofo, nè mèsù èndè kutàbalawù. Kùdi uvwa upùnga nè lufù, mukunya kùdi kànsèrè, kùdi mwena nsudì, kubàmòna bààlukila nè mubidi tumatuma, nè makàndà à mubidi tumatuma cyàkàbìdì. Nkaadikù muMumòne wàkula nè bàkwàciki bàà maalà à kapyà, beena mitù minyùngùlùke, nè babèngiibwe, nè musumbà wà bàdi kabàyi pàà bwàsà, nè bàlwa bainàbànzà nè balùme bakàlàngà, nè bansantu bàà Nzambì udi nè mwoyi, bwalu Dìyì dyà Nzambì dyàkaakula. Ke citùdì tutèèleja, leelù ewu.

¹⁴⁵ Ndekèlaayi njikijè mu kwamba kwà eci nùнку: Nekùlwe cikondo, cìikalà musùùkà wèbè mulalakanyi awu mwàngàciibwe mu mubidi wèbè, kàdi kùyawù mu mwaba wàwù kampàndà wà kashidi, wùlalakana mu mìdimà, anyì mu cyàdì cyà Nzambì. Dìyì adì nedyàkule cyàkàbìdì. Kàdi Bible mmwàmbè, nè: "Bònsò bàdi mu lukità nebàteelejè Dìyì Dyèndè, nè nebàpatukè. Bàmwè nebàlwe ku bundù nè dipeetudiibwa dyà kashidi. Nè bakwàbò nebàlwe bwà ditalala dyà kashidi nè disànkà."

¹⁴⁶ Dìndà edi ndifwànyine kwikala cikondo cyùdí wangata dipàngadika dyèbè, nè anyì neùtèèleje cìdì ntèlèviziyò wàmba, anyì cìdì cibèjibeji cyàmba, anyì cìdì beena tèlòlǝjì bàmba, anyì cìdì Nzambì wàmba. Lekèlaayi nnwàmbilè, nwènú bu cisàmbà. Kanùtèèlejìkù cìdì ní ncinyì cyàmba to, ànu cìdì Nzambì wàmba. Ikàlà windila kaaDìyì kakesè kapòle aku, nè Yéyè neàkushintùlùlè.

¹⁴⁷ Wèwè udi wamba nè: "Ndi muswè kwitabuuja, Mwanèètù Branham. Mvw'a kujingakù ngìkalakù mwà kwitabuuja. Mvw'a kujingaku ngìkalakù mwà kwenza bintu kampàndà." Kàdi kanwèna mwà kwenza nàнку to. Bwà cinyì? Kanwèna nushààla

batùùkije ntàntà bule bukùmbàne to. Kanwèna nukabwela mu mwaba kampàndà mùdi m—mpatà yònsò miyè to.

¹⁴⁸ Paùdì ubwela mu mwaba wùdi mpatà mimanè kujika, dìbà adi newikalè mudishikàmine, nè udi mwà kutèèleja Dìyì dyà Nzambi dyàkula. “Mwân’Àànyì, Mémè ke Musùngidi webè. Mwân’Àànyì, Mémè ke mwondopi webè. Kabyèna bikèngela bwà wèwè kwenza bintu ebi to. Ndi mufwè bwà wamòna mwà kwikala mudishikàmine. Kàdi paùcidi ànu mwìnshì mu dilubakana edi, musopàkàne nè mishindù yònsò yà mēyì, dikùpebi kule nè ònsò awu.”

¹⁴⁹ Bidi bimvùlwija cikondo kampàndà cìmvwà mu mikùnà mwàmwa musangu kampàndà. Nènku ncyàdyàkupwàku malabula awu mwoyi to. Nè mwab’ewu kùkaadi bidimu bitwè ku dikumi, anyì bipite apu, mvwa munkaci mwà kwambulwisha Mukalenge Jefferies mu dyungwija dyà nyama, nènku mpàvwàbò bènda nè mukelè muswikila paanyimà pàà tùbalù. Nènku mvwa nya naayi ku mabwe kampàndà à dilàkilapù mwaba wùmvwà mwà kuyilekelela, mwaba wùvwà ngombe mwà kulwa. Lwà paanyimà pààpa, mu kilòmèètà yìpacila ku lukàmà nè dikùmi nè yìbìdì nànu awu, kule nè bantu. Anyì, ndi muswè kwamba nè, lwà mu ntàntà wa kilòmèètà mitwè ku makùmi ànaayi nè mwandamukùlù, anyì makùmi àtaanu nè yìsambòmbò, pàmwàpa kilòmèètà makùmi àsambòmbò nè yìnaayi, too nè ku Kremmling, mu Colorado, mùdi ukafika ku kaacimenga kakesè kàà búngì bwà bantu bìipacila ku nkàmà mwandamutekète anyì mwandamukùlù. Nènku mvwa nè kàbalù kàànyì, nè mvwa mukàsùlùlùle bibuta pambidi, mukùùmushè mabùkì. Nènku tudi tutàngidila ku, tukebelangana nè ngombe ayi ku tulòndò twà lùmònu. Nènku mvwa muswikile kàbalù kàànyì ku ditàmbà dyà mucì, nè matempu àvwa paanyimà pààkù, mbwena kwamba nè, kàbalù aku, kàbalù kàdì kambùle mabùkì kàdì kumpàlà kwà mulongo, ke mémè kubànda pa tukùnà atu, nè bìvwa bilenga byà dikèma, mùvwa mmu movù wà bintu bitòloka, nènku mvwa ntàngila mu bibandabanda amu, ntàngila tuubyonà tukesè twà màyì, mu ntàntà mule, nènku pàmvwà ntàngila apu, mùvwa mmunkàcinkaci mwà mapingaja, ke mémè kumòna cintu kampàndà cyàkandengà bikolè.

¹⁵⁰ Mémè kumòna maamù mukùlàkàje ùpàtula bânà bèndè mu diswa dyèndè amu, nyuunyi wa mukankù mukùlàkàje. Kàdi kupaapalayè eku nè eku pamutù pààbù apu too nè mwàkabàmbulàye pa mapwàpwà èndè. Nènku bàkaavwa bapàtùke mu diswa amu kumpàlà. Kàdi kuyayè naabò mu cibandabanda. Kacya kabàvwakù bânjì kudyatamù kwònsò aku to. Bàvwa ànu munkaci mwà kulonga bwà kubùuka. Pa nànu, kubàlekelelayè. Ke kuyabo nkààyaabò, bàzòkola mashinde, bàkùlukilangana umwe nè mukwàbò, kabàyì ànu nè bìvwà bùbàtonda to nè mwàbò mwònsò. Nènku pàmvwà musòmbe kuntwaku, mémè kudyàmbidila nè: “Mpindyewu, aci kacyèna

ànu bu musùmbà wà beena Kilistò balelèla, bàdi bìitabuujà anyi! Kabèèna nè bùdi bùbàtonda to.” Bwà cinyi kabàvwa nè bùvwa bùbàtonda? Kabìvwa bìkèngela bwà kuciinabò cintu nànsha cimwè to, bwalu maman ùvwa mwalùkile buludi muulu nè musòmbe pa lubwebwe, bwà kubàtàngila. Kaa! Aci’s cidi ànu cìcìshintulula bikolè.

¹⁵¹ Panùdi nufika ku dyela meeji nè: “Ncinyi cìikalà Mpaasàtà *Kampàndà* mwà kwela meeji byòbi byenzèke nè mpetè Nyumà Mwimpè? Mwèpiskòpò *Kampàndà* neámbe cinyi?” Cidìbo bàmba nànsha ciikàle cinyi.

¹⁵² Yesù wàkafwà, nè Wàkabànda bimbàndilu byà mu Butùmbi, nè mMusòmbe mu maulu à maulu. Kakwèna cintu nànsha cimwè cìikalà mwà kukutàcisha to. Dìsù dyèndè nditàngile mushàámushà, nènku ndi mumanyè nè Yèyè mmuntàngile, nè Yèyè mmukutàngile.

¹⁵³ Dìbà adi pàdìku kùlwa, kwòkò kufwànyine kulwa mubwàbwà, anyi cintu kampàndà bwà kutàcisha ùmwe wa bânà bakesè abu, mòna’s, maamù. . . Mbitàmbe bwimpè bwà kabàteecikù to. Yèyè’s ùdi mwà kubàkula mubwàbwà awu mu cyanza, mu nzàdi yèndè amu, kubànda naawù muulu mu butùmbùke bwà binunu byà makàsà kàdi kuwùlekelela ànu’s. Mmufwànyine kusùsulukila mu mpeepèlè. Kakwèna cintu nànsha cimwè cìikalà mwà kutàcisha bânà bakesè abu to. Yèyè neàtabaleelè bwalu abu.

¹⁵⁴ Cintu nànsha cimwè kacyàkukutàcishakù to. Kùcìinyi bwà kukwàta Nzambi ku Dìyì Dyèndè to. Dilekèlèle ànu cyanààna, nè ikàlà nè diitabuujà, nè itàbùùjà. Yèyè ùdi munkaci mwà kukutàngila. Yèyè neàsùsululè cintu kanà cyònsò cidi citeeta kukutàcisha aci. Kaa, ncifwànyine kukubunda, kàdi kacyèna mwà kukwenzela bibi to. “Bwà bintu byònsò,” Yèyè ùdi wànyisha nè byènzekè. Kí ncifwànyine kwikala cintu cikwàbò nànsha cimwè to: “Bwalu bìdi bikwàta mudimu pàmwè bwà dyàkalenga dyà aba bàdi banangè Mukalenge.” Kakwèna cidi mwà kukwenzela bibi to.

¹⁵⁵ Nànku awu, paanyimà pàà katanci, kulwakù cipeepèlè cikolè. Kàdi pàakatwàdijà cipeepèlè cikolè aci, cyàkalwa nè lukàsà, byèbè byà ku nord abi’s, nkwelèke ànu kamupenyi kakesè ke cipeepèlè aci pàaci cyènda cilwa, nè lùbilu lwà kilòmèetà makùmi citeèmà nè yisambòmbò anyi lukàmà nè dikumi nè yibidi ku dìbà dimwèpelè. Ke maamù mukankù mukulàkàji awu kushiya lubilà lukolè lunène, kàdi ke yèyè uyààya mupwèkè mu cibandabanda amu awu. Nè lubilà lukolè alu, lwàkenza cinyi? Tuumikankù tukesè atu tùvwa tumanyè dìyì dyà mamwàtù.

“Mikòòkò Yànyì mmimanyè Dìyì Dyànyì,” mwàkambàYe.

¹⁵⁶ Njìwù yìkaavwa pabwìpì. Mpindyewu, katwàkateeta bwà kubwela mwìnshi mwà bitùpà binène byà mici to. Katwàkateeta

bwà kunyeema kukabwela mu mushiki wà bukooya wà mùshindù kampàndà to. Tùvwa ànu twindile maman.

¹⁵⁷ Ke civwà cikèngela bwà mwena Kilistò kwenzayè ncyôci aci; kumòna ciikalà Nzambì mwà kwenza pa bwalu abu.

¹⁵⁸ Kàdi maamù mukùlàkàji awu—awu mmwenzè ànu ùlenga buloba, makàsà manènè menemene à bunène *nũnku* awu, kutùulukayè panshì ànu bu ndèkè munène wa katankù wikila panshì. Ke kukùpayè mutù wèndè mu lupeepèle nè kwelayè lubilà lukolè, nè kubaalulayè mapwâpwâ manène awu, ipacila metèlè ànaayi nè citùpà, kwambwila ku lusongo nè ku lukwàbò, maalabàle bu mùdi kwangacila ku dikunji *edi* nè ku dikunji *dyàdya*. Tuumikankù tukèsè twònsò atu kuvùkutatù lubilu nè mwàtù mwònsò, nè kutùpikilatù ànu pa mapwâpwâ à mamwàtù apu. Kwololatù ànu tukàsà twàtù tukèsè atu nè kwela nzàdi, kwangatatù tuumiinù twàtù tukèsè atu, kàdi kupyàtu mu òmwè dyà ku masàlà àdi mashilè ndendende awu. Maman kubàmbula ànu cyanààna, kàyì nànsha ùzakeeja mapwâpwâ awu to, kàdi kubànda mu lupeepèlè amu. Ke yèyè uyààya buludi mu mbwebwe wàwa, bwà kubàsokoka kule nè cipeepèlè cikolè civwà munkaci mwà kulwa aci.

¹⁵⁹ Kaa, mwanèètù, cipeepèlè cikolè cikaadi pabwìpì. Tèèleja Dìyì Dyèndè. Dìdi dikubìikila nè: “Pàtukà mu Baabùlòona. Ikàla mutàpùlùke. Kanùlù kwikala baabanyanganyi bàà yèndè, bàà mpèkaatù yàbò to. Mémè nènwnwàkidilè. Nenwikalè bàna bàà balùme nè bàà bakàji Kùndì. Mémè nèngùikalè Nzambi kunùdi.”

Twìnyikàayi mitù yètù bwà katanci kakesè cyanààna, patùdi tujikija apa. [Mwanèètù wa balùme kampàndà ùdi ùfla dìyì dyà cipròfetà—Muf.]

¹⁶⁰ Amen. Nuumvù aci's. Aci ke citùdi tubìikila nè ncipròfetà mu èkèleeziyà.

¹⁶¹ Kùdikù mwà kwikala bàmwè kaaba aka mu dindà emu, ndi mumanyè nè bàdikù, bàdi bafwànyine kwamba nè: “Mukalenge Nzambi, ikàlàku naanyi luse. Nànsha mùndì mukashàale wa mu èkèleeziyà, mwenzè ditonda, kàdi ncyèna—ncyèna mumanyè nè kushàala mutùukije kumpàla Kwèbè ncinyì to, nè kutèeleja Dìyì Dyèbè dindombola nè dindongesha. Ncyèna mufwànyine kumanya cyà dyenza to bu Wèwè mwà kwakula naanyi mu Dìyì dijìkùke. Ndi mwà kunanga bwà kuKumanya, bwà Wamòna mwà kwakula naanyi nè kuludika tujila twànyì anyi”? Nudikù mwà kwela byanza byènu muulu mpindyewu mene kwamba nè: “Nzambì, ikàlàku nè luse anyi”? Mukalenge ànùbènèshè, myaba yònsò, kùdi byanza myaba yònsò. Tùngunukàayi ànu nè kubyèla muulu. Ncyà bushùwà. “Mukalenge, ikàlàku naanyi luse. Ndi Neebè dijìnga dyàbùngì.” Nkufwànyìnekù kwikala bakwàbò kàbìdi kumpàla kwà kujikija anyi? Nzambì mmumòne byanza byèbè lwà paanyimà pàapa, inàbànzà, nè nwènu bònsò lwà paanyimà pàapa, nè bàdi biimàne mu milongo nè bikwàbò.

Nzambì mmukumòne, nànsha pa cibùmbà cyà ku cyambilu apa, lwà kuulu eku.

Ke Samwèlè kwambayè nè: “Eli, uvwa mumbiikile anyi?”

Eli kwambayè nè: “To, mwanàanyi wa balùme, ncyénakù mukubiikile to.”

¹⁶² Awu kàvwa mmémè uvwa wakula nè mwoyi wèbè to, mulundà wanyi. Awu uvwa n’Nzambi. Andàmùnàku ànu cyanàànà wàmbè nè: “Musadidi Webè ùdi ùmvwa. Nènku mbwejèku mu bukùbì Bwèbè, leelù ewu, Nzambi. Enzàku nè, kubangila ku ditùkù edi, ngiikalè mémè yònsò Webè.”

¹⁶³ Nzambì wa Cyendèlèlèlè, munangi wa musùukà, Mufùki wa bintu byònsò, pàvwà kaaDìyi kapolè kakesè kàà Nzambì kààkaakulà nè Samwèlè aku, kààkaakula nè Shawùlà aku, kààkaakula nè Peetèlò aku, kààkaakula nè Danyèlè, nè Yeshàayi mupròfetà, nè bònsò munda mwà bikondo, nkaakùle cyàkàbìdì mu dindà emu mu tabernacle. Pàmwàpa makùmi àsàtù pàmwàpa, anyi makùmi ànaayi, anyi pàmwàpa byanza makùmi àtaanu, à bangènzàmpèkààtù nè bidimba byà èkèleeziyà, nè bantu biikàlè nè dilubakana, mbeelè byanza byàbò muulu. Bààbùngi bàà kùdìbò bàvwa kaaba aka makèèlèlèlè dilòòlò awu, nè kutèelejabò Dìyi Dyèbè dilwa dijìkùke. Nènku mpindyewu, mu dindà emu, Dìyi dimwèdimwè adi didi dyàkula mu ndòndò wa mwoyi wàbò. Bèdì byanza muulu, nè byanza byàbò bitàngija mu Dyulu, bàmba nè mbapiile, nè mbaswè kwikala babinge.

¹⁶⁴ Wèwè udi mwambè mu Dìyi Dyèbè, nè: “Muntu nànsha umwe kèna mwà kulwa kùNdi, pàdì Taatù Wanyi kàyi mumukòke dyàmbedi to. Nè yònsò wàlwà awu, Nèmmupèèshè Mwoyi wà Cyendèlèlèlè. Nè nèmmubiishè ku lufù ku ditùkù dyà ndekeelu.”

¹⁶⁵ Wèwè ngwàkacilaya, Taatù. Mpindyewu tudi tuKusòka, bu musadidi Webè, bwà kupèèsha aba bàdì belè byanza byàbò muulu, Mwoyi wà Cyendèlèlèlè nè disànkà dyà Cyendèlèlèlè. Nènku swàkù bwà biikalè nè mwoyi Bwèbè Wèwè, matùkù àbò ónsò à mwoyi. Nènku ku ndekeelu kwà njila wa lwendu lwà mwoyi, bàbwelè mu masànkà à Mukalenge. Enzàku nànkù, Taatù. Tudi tulòmba nùnkù mu Dìna dyà Yesù nè bwà bwalu bwà Yesù. Amen.

¹⁶⁶ Mbanganyi bàà kunùdì bàdì baMunangè nè mwoyi wènù wònsò, ànu nè mwoyi wènù wònsò? Mpindyewu, mu myaba mikesè eyi mùshindù ewu. . . Ndi ànu pashiishe. Kàdì Bible mmwàmbè, nè: “Tudi basòmbe pàmwè mu myaba yà mu Dyulu mu Kilistò Yesù.” Nyumà Mwîmpè ùdi ùlwa, ùbwela mu Dìyi, ùpweka ùpìcila mu batèeleji amu, nè udi ànu mwà kuMutàngila pàdiYe ànu ùtwa eku nè eku kumutù kwàbò, ùbàshintulula.

¹⁶⁷ Ànu mungàmbì amu, mémè ndi ngiitabuuja masaluka. Bushùwà’s. Kàdì, wèwè, cidì. . . Nwamònu’s, masaluka kî ng’adi àkushintulula to. Masaluka àdì nè cyà kubwela buludì nè

mu ndondo mu mùshindù wà bilenga nsòmbelu mulenga wa buumùntù bwèbè. Aci's ke cidi cikushintulula ku wa mpèkaatù. . .

168 Ngènzàmpèkàatù ncinyi? Mwena bupidyà. Kùdi bantu bààbúngi leelù ewu, biikàle nè—nè dipòlomè dyà Licencié, biikàle nè dipòlomè dyà bu docteur, biikàle nè Ph. D., nè misangu yibidi L. D. ku dîna dyàbò, kàdi biikàle ànu bangènzàmpèkàatù. Bamanyè Bible kwambwila ku Genèsè too nè ku Bwàkabuulwibwà, bàyiisha mu cyambilu, kàdi bacikàle biitabuu- . . . kabàyi biitabuuja. Bible mmwàmbè nè: “Ewu udi kàyì wìtabuuja to mmumanè kupiishiiibwa.”

169 Konkàayi umwe wa ku bantu abu piikalàbo biitabuuja nè Nyumà Mwîmpè ngwa leelù ewu. “Mòna's, nànsha kakesè.” Udi wìtabuuja nè dyondopa dyà kùdi Nzambi didikù anyi? “Mòna's, nànsha kakesè.” Dìbà adi yèyè mmwena bupidyà. Ncyà bushùwà. Piikalàbi nè Nyumà Mwîmpè ùdi munda mwèbè, Yèyè kàakufilakù bujaadiki ku Dìyi Dyèndè Yèyè mwìnè anyi? Kàdi nyumà udi munda mwèbè awu yèyè ùfla bujaadiki bibèngangana nè cidi Nzambi wàmba nè ncilelèlè, kí n'Nyumà wa Kilistò to. Udi mufwànyine kwikala wa mu èkèleeziyà wa Kilistò, kàdi kwèna wa Kilistò to pàdi nyumà webè kàyì ùtwa “amen” ku mulayi wònsò wùdi Nzambi mufile. Nè pàakalayàYe. . .

170 Peetèlò wàkamba, mu Ditùkù dyà Mpenta, yèyè nè: “Nyingàlalaayi, muntu nè muntu wa kunùdi, nùbatiijiibwè mu Dîna dyà Yesù Kilistò bwà dilekelediibwa dyà mpèkaatù yènu, nènkù nenùpetè kupà kwà Nyumà Mwîmpè.” Kàdi piikalà nyumà webè wàmba nè aci cìvwa bwà ditùkù dikwàbò. . . Ncinyi cìvwa Mufùndu mwàmbè? “Bwalu mulayi wùdi kunùdi nwènu,” beena Yudà, “nè kùdi bàna bèènu balela, nè kùdi aba bàdi kule,” bàà Bisàmbà byà bendè, “mu búngi bwònsò bwàbiikilàbo kùdi Mukalenge Nzambi wetù abu.” Mulayi wùm wèwùm wè awu.

171 Yèyè wàkamba nè: “Mémè ndi Mwonji wà mvinyò, nwènu nudi matàmbà.” Nènkù piikalàbi nè n'Dilongesha dyà ditàmbà, ditàmbà dyà kumpàlà, ditàmbà diibìdi didi nè cyà kwikala nè Dilongesha dimwèdimwè adi. Nè Dilongesha dimwèdimwè adi nedìtwalè bipeta bimwèbimwè abi. Nènkù pàdi ditàmbà dyònsò dilwa pa mwonji wà Mvinyò, nedikwame cintu cimwècimwè aci. Ndi nè disànkà, mu dindà emu, ndi nè disànkà dyàbúngi dyà kumanya nè Nyumà wa Nzambi udi nè mwoyi ùcidi ànu uyiikila nè wàkula nè bantu, nè ùshindika Dìyi Dyèndè.

172 Netùditwè mu mudimu wà dibàtiiza ànu mu katanci kakesè cyanààna emu. Pawikalà mummyaminyiibwe màyi, mupòngolwela màyi, anyi mwinyija mu màyi mu mùshindù kanà wònsò kamùyi mu Dîna dyà Mukalenge Yesù Kilistò to, udi mwediibwe kadyòmbò bwà kulwa ku màyi.

173 Mpindyewu wêwè udi wamba nè: “Mwanèètù Branham, nguswa kungambila mêmè anyi?” Èyowà’s, mwanèètù.

174 Dimyaminangana dyà mâyi kî ndyakùdiibwe mu Bible to. Kakwèna mwaba nànsha wùmwe mu Bible wùkaadiku muntu nànsha umwe mummyaminyiibwe mâyi to. Mpindyewu vùlukàayi eci, ndi mukonkè mu cyambilu emu, mu lumingu lujimà: Mpetèlaayikù mwaba wùkaadiku muntu nànsha umwe mu Bible emu mummyaminyiibwe mâyi bwà dilekelediibwa dyà mpèkaatù yèndè, nànsha mupòngolwela mâyi bwà dilekelediibwa dyà mpèkaatù yèndè, anyi nànsha mubàtijiibwe mu diinyijiibwa mu mâyi mu dîna dyà “Taatù, Mwànà, Nyumà Mwimpè” bwà dilekelediibwa dyà mpèkaatù yèndè. Kacya kakùtukù kwânji kwikala muntu mummyaminyiibwe mâyi, mupòngolwela mâyi anyi mubàtijiibwe mu dîna dyà “Taatù, Mwànà, Nyumà Mwimpè,” mu Bible mujimà kwambwila ku cizubu cyà mbangilu nè cyà ndekeelu. To, mukalenge. Bàvwa . . .

175 Kùvwa bàmwè bantu babàtijiibwe musangu kampàndà kùdi Yone Mubàtiji, nè bôbò kabàvwa babàtijiibwe mu dîna nànsha dimwè to, kàdi’s bàvwa babàtijiibwe kùdi muntu umwèumwè wàkabàtiiza Yesù awu. Kàdi Pòlò, pàakatwilanganàye naabò mu Byenzedi 19, kubàmbilayè nè bàvwa nè cyà kulwa kubàtijiibwa cyàkàbìdi mu Dîna dyà Yesù Kilistò, bwà cyanàànà kabàvwa mwà kupeta Nyumà Mwimpè to.

176 Pàakasanganà Peetèlò bàmwè bàvwa bapetè Nyumà Mwimpè kumpàlà kwà kubàtijiibwabò mene, wàkabàtùmina dîyi nè wàkashàala naabò too nè pàakabàtijiibwabò mu Dîna dyà Yesù Kilistò. Aci’s ncilelèlè, mulundà wanyi.

177 Ndi mumanyè nè bantu bàabûngi batu bamba nè: “Mpindyewu, Mwanèètù Branham ùdi ànu mwena nè Ànu Yesù Nkàâyèndè.” Aci ncyà mafi.

178 Mêmè ndi ngùtabuuja ànu Mifundu. Ncyèna wa mu nànsha dimwè dyà ku màngumba awu to. Nènku beena nè Ànu Yesù Nkàâyèndè kabàtu bàbàtiiza mùshindù awu to, nànsha nànku. Bàdi ànu bàbàtiiza cyanàànà, mu Dîna dyà “Yesù.” Bible mmwambè nè: “Mukalenge Yesù Kilistò.” Kùdi ba-Yesù bàabûngi, kàdi Mukalenge Yesù Kilistò ànu umwèpelè. Nwamònu anyi? Nwamònu anyi? Kilistò ke Maasiyà awu. Nwamònu anyi? Nènku aci’s ncyà bushùwà.

179 Nènku mpindyewu, nwènù balundà bàanyi, mpindyewu, nwènù bàdi kaaba aka mu dîndà emu abu, bàtù kacya kanùyiku bânji kubàtijiibwa mùshindù awu to, Dîyi dikesè dipolòbèle dyà Nzambi dyàkwilèku mu ndòndò wa musùukà wèbè. Nè kùyi utàngila cidi mwèpiskòpò, cidi èkèleeziyà, cidi ní ncinyi ní ncinyi kanà cyònsò cyàmba to, lwàkù ùtùmikile Mukalenge, ke dyanyi dîyi dîndi ncutùmina.

180 Nènku, mpindyewu, Mwanèètù Neville neàye ku cibambalu eci, bwà kudilongolola bwà mudimu wà dibàtiiza. Nè aba bàdi—

mu dìnà dyà “Taatu, Mwànà, Nyumà Mwímpè” mu Bible emu to. Cikenketaayi. Nùcipetè. Pìikalàciku, lwâyì nùndeejè, pa cibùmbà cyà ku cyambu apa dilòlò edi. Dìbà adi, pawikala bakwenzèlè mùshindù awu, udi ulonda bilèlè byà bantu.

¹⁸⁸ Nènkù muntu yéyè mukwambile nè: “Èè, lwàkwaku kùnu wènzè ditonda dyèbè, udi upeta Nyumà Mwímpè dìbà adi.” Aci ncyà mafi. Aci’s ndilongesha dikwatakaja kùdì bantu.

¹⁸⁹ Kùdì dibàtiiza dyà mu màyi dyà mashimi. Kùdì dibàtiiza dyà mashimi dyà Nyumà Mwímpè. Dyabùlù ùdì ùCìtentula bwalu yéyè mmutèndeledi. Kaayinà, tatwèndè ùvwa mutèndeledi, ànu mutùdì bacimòne. Dimiinu dyà nyòka dicidi ànu ditùngunuka. Nè Dimiinu dyà mukàji, kupicila ku Kilistò, dicidi ànu ditùngunuka.

“Kàdi, muntu nànsha umwe kèna mwà kulwa pàdì Taatu Wanyì kàyì mumukòke to.”

¹⁹⁰ Mpindyewu elàayi meeji bwà bàmwè bàdì basòmbe kaaba aka, mu dindà emu, bàdì bamanyè nè nudi babàtùjijibwe mu mùshindù wà mafi abu, mu twitabàayi wa muntu, kàdi kabiyi bilondèshile Bible to, nènkù dileidi bwa dyèbè dyà kumpalà dyà ditonda adi ndyà mashimi. Mmuni mùdì mwà kwikala mubinge, paùdì kùyi mwalùkile nè mutwàdije bìmpè? Nudi bavùluke nè, lumingu elu, ndi muiishe nè: *Kabyàkadi Nànkù Ku Cibangidilu To*.

¹⁹¹ Mpindyewu, kàdi bu wèwè mwà kuumvwa Dìyì dyàkula neebè, n’Nzambì, bwalu Dìdì dipetangana nè Mifundu. Kabiyi nànkù to, dìbà adi kùdì dīyì dibì dyà mùshindù kampàndà dyàkulangana neebè. Kàdi Dìyì dilelèlè nedikwambilè bwà kulonda tunungu twà Bible; kī mbyà dimyaminangana dyà màyi to, kī mbyà dipongolwelangana dyà màyi to, kī mbyà mafi abi to. Pàtuka ànu buludì nè ùlondè tunungu twà Bible.

¹⁹² Enzàayi nànkù, balùndà bàanyi, nànsha binùkèngela bintu byònsò. Nànsha byòbì mwà kundòmba cinyi, nènteekè ku luseke bintu byònsò, bwà kulonda Mukalenge Yesù.

¹⁹³ “Tèelejà Dìyì Dyanyi. Mikòòkò Yanyi neyitelejè, nè neyilwe kùNdì. Nè bònsò bàalwà kùNdì abu, Mèmè nèmbàpèeshè Mwoyi wà kashidi, nè nèmbàbìishè ku lufu ku matùkù à ndekeelu.” Ncyà bushùwà anyi?

¹⁹⁴ S’ki cyòci eci, cikùmbànàngàne ànu menemene nè Mifundu. Muntu nànsha umwe kèna mwà kujaadika nCibì to. Ncyà bushùwà. Muntu nànsha umwe kèna mwà kujaadika nCibì to. S’ki cyòci eci, mu Bukolè bwà Nyumà, munkaci mwà kwenza bintu bimwèbimwè byàkenzà Yesù abi. S’ki Yèyè ewu, mu cimfwanyi, Dikunji dyà Kapyà dimwèdimwè adi, dikwàta mudimu, mamuma àmwèàmwè awu, Nyumà umweumwe awu, ùtwàla disaluka dimwèdimwè adi, cyenzi cimwècimwè aci, bimanyinu bimwèbimwè abi, maalu à kukèma àmwèàmwè awu.

Ki bwalu mbwôbù abu's. Tèelejàayi Dìyì dyà Nzambi mu dindà emu.

Kàdi's Dìyì dyàkamba nè: "Samwèlè."

¹⁹⁵ Yèyè nè: "Èyowà's, Mukalenge. Èyowà's, Mukalenge. S'ki mèmè ewu. Musadidi Webè nyèyè ewu. Musadidi Webè nyèyè ewu. Nèndondè."

Nzambi àbèneshe inàbànza awu. "Nèngiikalè. . ."

¹⁹⁶ Wèwè udi wamba nè: "Mwanèètù Branham, wèwè's udi uvwija aci cikalè cyà cyènza nè bwôwà." Ndi muswe bwà nè ciikalè cikalè menemene. Cidi pankaci pàà Mwoyi nè lufù, pa nàнку ndi nè cyà kucivwija cikalè menemene. Mukalenge ikalè neenù, ke disambila dyànyì dyà meeji matòòke ndyòdi adi.

¹⁹⁷ Mpindyewu, kumpàlà kwà kutentemunabò nkwasà yà nzùbu ewu, bwà kupeta. . .bwà nwamòna dibatiiza. Mwaba ewu mmukàngula dībà dyònsò. Ndi muswè kubalakù ndambù, kuumukila ànu buludi mu Mifundu, bwà nwamòna nè ndi—ndi mbala.

¹⁹⁸ Yesù Kilistò, mu nshapità wa 16 wa Maatàayi Munsantu, ngèèla meeji, wàkambila Peetèlò nè: "Ndi nkupèèsha nsapì yà Bukalenge bwà mu Dyulu. Cyònsò cyùdi wèwè uswika pa buloba aci, Mèmè nènciswikè mu Dyulu; cyònsò cyùdi wèwè usùulula pa buloba aci, Mèmè nèncisùululè mu Dyulu." Nwènu bònsò nudi bamanyè nàнку anyì?

¹⁹⁹ Mu Ditùkù dyà Mpenta, pàvwà Bukalenge bwà Nzambi bulwè mu kaabujimà kàà Bukolè Bwàbù, nudi nwitabuuja nàнку anyì? Peetèlò, mwimàne. Mpindyewu, pàakabiikà Yesù ku bafwè, Yèyè kàvwa nè nsapì yà Bukalenge to. Ncyà bushùwà anyì? ["Amen."] Yèyè ùvwa nè nsapì yà lufù nè yà ifernò, kí nnsapì yà Bukalenge to. Kàdi eci's ke cyàkambàye pàakadiye ùyiisha, nè bàvwa munkaci mwà kutèeleja maaluu aa, kàdi bàakapapisha mwoyi wàbò. Ke cyàkambà Peetèlò ncyòci eci menemene.

²⁰⁰ Mpindyewu tèelejàayi nè ntèmà pàndi mbala Mifundu apa, bwà nwamòna mwà kuumvwa. Byenzedi, nshapità mwi2. Vùlukàayi. Mbanganyì bàvwà kaaba aka bwà kutèeleja diyiisha dyà nè: *Kabyàkadi Nàнку Ku Cibangidilu To?* Twàlukilàayi ku cibangidilu bwà tùmònè cidì dibatiiza, kubàtiizangana kwikàle bulelèlè. Mmùshindù kaayi wùvwàbi bikèngela bwà twètù kubàtiijiibwa? Bàmyamina màyi, bapòngolwela màyi, anyì mu dīna dyà "Taatu, Mwāna, Nyumà Mwimpè"?

²⁰¹ Vùlukàayi nè, ndi mwelè mwambi kanà yònsò kadyòmbò, mwèpiskòpò kanà yònsò ewu, muntu kanà yònsò ewu, mwaba kanà wònsò, dībà kanà dyònsò, bwà kundeejakù Mufundu wùmwèpelè mwaba wùkaadiku muntu nànsa umwe mummyaminyiibwe màyi, mupòngolwela màyi, anyì

mubàtìjìibwe mu dîna dyà “Taatù, Mwânà, Nyumà Mwîmpè.” Cìdi bwàshì. Kacyèna mu Mifundu to. To.

202 Ntwitabààyi wa mashimi, mukwàtakaja, mubanga kùdi èkèleeziyà wa Kàtòlikè. Dimyaminangana dyà màyi adi dyàkenjiibwa kùdi èkèleeziyà wa Kàtòlikè, bidimu bitwè ku nkàmà yisambòmbò paanyimà pàa lufù lwà muyiidi wa ndekeelu. “Taatù, Mwânà, Nyumà Mwîmpè” wàkangaciibwa ànu cikondo cimwècimwè aci, bwalu beena Kàtòlikè bàtu bàkuukwila nzambì mishìilèshìilàngàne, nè bààkenza búsàtù bwà midimu yà Nzambì. Kí n’Nzambì yisàtù to; Taatù, Mwânà, Nyumà Mwîmpè. Aci’s mbumpàngaanù.

203 Kùdi Nzambì umwèpelè. “Kwìkadi nè nzambì mikwàbò kumpàlà Kwànyi nànsha.” “Tèelejààyi, Èyi Izalèèlà, Mémè ndi Mukalenge Nzambì webè, Nzambì umwèpelè.”

204 Mwena Yuda wàkatùkonka nè: “Nzambì wenù nganyi; Taatù, Mwânà, anyi Nyumà Mwîmpè anyi?”

205 Mwaba awu ànu Umwe wabò. Mmidimu yisàtù yìdi Nzambì umweumwe awu mukwàcilemù mudimu, munkaci mwà kuDìmwènesha.

206 Dyàmbedi, mu Taatù, kàvwa mwà kulengiibwa to. Mulembèlèle pa mukùnà; nànsha ngombe anyi nyama mmufwànyine kulenga ku mukùnà awu, mmufwànyine kushipiibwa.

207 Pashìishe kutùlukaYè, bwalu Ùvwa muswè bwà kumukuukwilabò. Wàkaseemena pabwìpi nè muntu, bwalu Wàkalwa Mwânà wa muntu. Nzambì ùvwa munda Mwèndè.

208 Nè pààkenzàYe cyòci aci, pashìishe kwambaYè nè: “Katanci kakesè aka bàà pa buloba kabààkuMmòna kàbidì to. Kàdi, nwènù nenùMmònè, bwalu Mémè,” mupinganyi muleeji muntu, “Mémè nêngiikalè neenù, munda mwènù mene, too nè ku ndekeelu kwà buloba.” Yèyè nè: “Ndi mufùme ku Nzambì.” Cinyi? Dikunji dyà Kapyà. “Ndi ngàalukila ku Nzambì.” Wàkalukila anyi? Wàkalukila. Nè pashìishe pààkenzàYe aci, Yèyè kwalukila kùdi Nzambì.

209 Dìbà adi tudi tusangana Pòlò, mu dileesònà dyètù dyà mu dindà emu edi, mu njila mutàngile ku Damàsèkè. Nènku kusanganayè Pòlò pàvwàye mu njila apu. Nènku Wàkamubyànkula panshi. Kàdi pàakatàngilà Pòlò, Yèyè ùvwa cinyi? Dikunji dyà Kapyà cyàkàbidì, Bukènkè kampàndà bwàkamufomijà mèsù abu.

210 Tàngilààyi cyàkenzà Yesù pàvwàYe pa buloba, nè wàkambila mukàji awu mpèkaatù yèndè, wàkenza bintu byònsò ebi. Ke Yèyè nè: “Ncyèna ngèenza cintu nànsha cimwè pàdi Taatù kàyi muNdeeje dyàmbedi to.”

211 KuMukonkabo, bamba nè: “Bwà cinyi Kwèna upweka kuntwaku bwà kwondopa bantu bààba?” Kupìcilabo munkaci

mwà musumbà munène, mùvwà balèrà, bilèrènda, mpofò, nè beena bidimba byuminyine. Wàkondopa muntu kampàndà nè disaamà dyà mpàcì wa mènýì, anyì cintu kampàndà, mulààle pa kalààlu. Yèyè nè: “Bwà cinyì Kùyiku wenzela musumbà wàbù mujimà awu’s?”

²¹² Yèyè kwamba nè: “Bulelèlà, bulelèlà . . .” Yone Munsantu 5.19, mpindyewu, “Bulelèlà, bulelèlà, Ndi nnwàmbila nè, Mwànà kèna mwà kwenza cintu nànsha cìmwè mu Yèyè mwìnè to; kàdi ànu cìdìYe ùmòna Taatù wènza aci, ke cìdì Mwànà wènza.”

²¹³ S’ki Yèyè ewu mulwè cyàkàbìdì, mu matùkù à ndekeelu aa. Beena maalu à mamanya kabèèna mwà kucidyula to. Èkèleeziyà kèna mwà kucidyula to. Ke cyòcì aci, mmwalùkila buludì mu èkèleeziyà nè wènza cintu cìmwècìmwè aci. Nyumà’s! Nzambì mmuswè aba bìikalà mwà kukuukwila mu Nyumà nè mu Bulelèlà. S’ki Yèyè ewu.

²¹⁴ CyàkambàYe mu Ditùkù dyà Mpenta ncyòcì eci, Peetèlò munkaci mwà kuyiisha:

*Yesù ewu udi Nzambì mubìishe ku lufù, mùtùdì . . .
twètù bònsò tudi bantèmù. (Tudi bantèmù anyì?)*

*Ki bwà cinyì mwikàle ku dyàbalùmè dyà Nzambì
mubàndishùbwe, . . . mupetè kùdì Taatù mulayi wà
Nyumà Mwìmpè, yèyè ngudi mwicikije eci, cinùdì
nwènù numòna nè nuumvwa mpindyewu eci.*

*Bwalu Davìdì kààkabànda mu . . . dyulu to, kàdi
wàkamba yèyè mwine nè: MUKALENGE wàkambila
Mukalenge wanyì nè: Sòmba wèwè ku dyàbalùmè
dyànyì,*

*Too nè pangààvwijà beena lukunà bèbèbè citèèkedi
cyèbè cyà makàsà.*

*Ki bwà cinyì nzùbu mujimà wa Izalèlèlà àmanyè nè
ditwìshùbwa dyònsò nè: nè Nzambì mmwènzè Yesù
umwèumwè ewu, unùdì bapoopèle pa nkùrusè ewu,
byònsò bìbìdì Mukalenge nè Kilistò.*

*Mpindyewu pààkumvwàbo cyòcì eci, (bàvwa
mbatèndeledi abu) pààkumvwàbo cyòcì eci,
bààkalengìbwa bikolè mu myoyi yàbò, nènku
bààkambila Peetèlò nè . . . bàpostòlò bakwàbò abu
nè: Bakwètù wa yààya, netwènzè cinyì?*

²¹⁵ Netùye ànu cyanààna nè netwikalè bìmpè anyì? To, to. Nwadimukaayi, Peetèlò, wèwè ngudi nè nsapì yà Bukalenge mpindyewu. “Cyùdì ubàmbila,” mwàkambà Nzambì, “Mémè nèncìswikè mu Dyulu pawàcìswikà pa buloba.”

*Peetèlò kubàmbila nè: Nyingàlalaayi, yònsò wa
kunùdì, nùbatiijibwè mu dìnà dyà Yesù Kilistò bwà
dìlekelediibwa dyà mpèkaatù, nènku nenùpetè kupà
kwà Nyumà Mwìmpè.*

Bwalu mulayi wùdi kunùdì, nè kùdì bânà bèèni balela, nè kùdì aba bàdì kule menemene, mu bìngi bwònsò mene bwàbùkilàbo kùdì Mukalenge Nzambì wetù abu.

216 Mukwàbò Mufùndù. Bidimu makùmi àsàtù nè bìbìdì paanyimà pàà cyòci aci, Pòlò, lwà mu nshapità wa 19 emu:

Pòlò mumanè kupìcila mu nseke mitùmbùkè yà . . . Efèsò: ùdì ùsangana bayiidi kampàndà,

Ke yéyè kubàmbila nè: Nwàkapeta Nyumà Mwìmpè kacya nwítabuujà anyi?

217 Ba-Baptistes, lekèlaayi aci cipwekeku munda mwènù. “Nwàkapeta Nyumà Mwìmpè kacya nwítabuujà anyi?” Ndilediibwa, kî nditonda to.

. . . Katwèna bamanyè mpenyi pàdìku Nyumà Mwìmpè nànsha umwe to.

Ki yéyè kwamba . . . Nku cinyi . . . kunwàkabàtìijìibwa dìbà adi? Bààkabàtìijìibwa, Kùdì Yone . . .

Pòlò wàkabàmbila nè: Bulelèlà Yone wàkabàtìiiza . . . bwà kanyinganyinga, (kî mbwà dilekelediibwa dyà mpèkaatù to), bwà kanyinganyinga, wamba . . . nè bìwà bikèngela bwà nwènù kwitabuujà ewu udi nè cyà kulwa . . . mbwena kwamba nè, mu Yesù Kilistò.

Nènku pààkumvwàbo cyòci eci, bààkabàtìijìibwa mu dìnà dyà Mukalenge Yesù Kilistò.

. . . ke Pòlò kubàtentekelayè byanza, nè Nyumà Mwìmpè kulwa Yè pambidi pààbò; nè bààkaakula mu myakulu, nè kutùmbishabò Nzambì.

218 Mpindyewu lekèlaayi nwangàcìlè, Pòlò, mu kujikija mukàndà wèndè mufundilangana awu, Galàtìyà 1.8:

. . . nànsha twètù, anyi mwanjèlò wa mu dyulu, munùyiishe evànjeeliyò mukwàbò kàyi ewu unùkaadi bamanè kuumvwa, ikale kunùdì mwedùibwe mulawu.

219 Ndi kàbìdì mufwànyine kuya neenù mu Kolintò, nshapità wa 14, mvensà wa 38, mùdìYe mwàmbè nè:

Muntu yéyè ùjìkula nè ngwa nyumà, anyi mupròfetà, ajingululè nè . . . cìndì nnùfùndìla eci mmèyi matùma à Mukalenge.

Kàdì yéyè mwikàle mupangi, ikale ànu mupangi.

220 Citwènzà bwà bwalu abu ncinyi? Cileeeji cyònsò . . . Bu mèmè mwikàle wèbè, nè mwikàle nciyi mubàtìijìibwe bilondèshile dibàtìiiza dyà bwena Kilistò to, cìvwà èkèleeziyà wanyì wèla meeji nànsha ciikàle cinyì, anyì cìvwà mààmù wanyì wèla meeji, ndi muswè kumanya cìdì Mukalenge wanyì ùtùma dìyì bwà kwenza.

²²¹ Mukalenge Yesù, m'Bèèbè Wèwè mpindyewu. Nènku ndi ndòmba bwà Ùkwatèku mudimu pa mwoyi wònsò. Nènku pèeshakù aba, bàdi mu ciinà cyà mâyi bwà kubàtijiibwabò abu, Nyumà Mwimpè, pàdibo baKwindile apa. Mu Dìná dyà Yesù tudi tuKulàmbula musumbà wa bantu ewu, bwà mu Ditùkù adi, Mukalenge, ncìkadikù mupùile to, kàdi musùlùdìbwe ku mashi à bantu bònsò; ncìyi mmwimànyìne ku cilèlè kampàndà, anyi dìngumba kampàndà, anyi bulongolodi kampàndà to, kàdi mmwimànyìne pa Dìyi Dyèbè. Amen. 🐦

58-1005M Tèèlejà Dîyi Dyèndè
Branham Tabernacle
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org